


齊



南齊書序

南齊書八紀十一志四十列傳合五十九篇梁
蕭子顯撰始江淹已爲十志沈約又爲齊紀而
子顯自表武帝別爲此書臣等因校正其訛謬
而敘其篇目曰將以是非得失興壞理亂之故
而爲法戒則必得其所託而後能傳於久此史
之所以作也然而所託不得其人則或失其意
或亂其實或析理之不通或設辭之不善故雖
有殊功躋德非常之迹將闇而不章鬱而不發

而檇杌蒐瑣姦回凶慝之形可幸而掩也嘗試
論之古之所謂良史者其明必足以周萬事之
理其道必足以適天下之用其智必足以通難
知之意其文必足以發難顯之情然後其任可
得而稱也何以知其然邪昔者唐虞有神明之
性有微妙之德使由之者不能知知之者不能
名以爲治天下之本號令之所布法度之所設
其言至約其體至備以爲治天下之具而爲二
典者推而明之所記者豈獨其迹邪并與其深

微之意而傳之小大精麤無不盡也本末先後
無不白也使誦其說者如出乎其時求其指者
如卽乎其人是可謂明足以周萬事之理道
足以適天下之用智足以通難知之意文足以
發難顯之情者乎則方是之時豈特任政者皆
天下之士哉蓋執簡操筆而隨者亦皆聖人之
徒也兩漢以來爲史者去之遠矣司馬遷從五
帝三王旣歿數千載之後秦火之餘因散絕殘
脫之經以及傳記百家之說區區掇拾以集著

其善惡之迹興廢之端又創已意以爲本紀世家八書列傳之文斯亦可謂竒矣然而蔽害天下之聖法是非顛倒而采摭謬亂者亦豈少哉是豈可不謂明不足以周萬事之理道不足以適天下之用智不足以通難知之意文不足以發難顯之情者乎夫自三代以後爲史者如遷之文亦不可不謂雋偉拔出之材非常之士也然顧以謂明不足以周萬事之理道不足以適天下之用智不足以通難知之意文不足以發

難顯之情者何哉蓋聖賢之高致遷固有不能純達其情而見之於後者矣故不得而與之也遷之得失如此況其他邪至於宋齊梁陳後魏後周之書蓋無以議爲也子顯之於斯文喜自馳騁其更改破析刻彫藻績之變尤多而其文益下豈夫材固不可以強而有邪數世之史旣然故其事迹曖昧雖有隨世以就功名之君相與合謀之臣未有赫然得傾動天下之耳目播天下之口者也而一時偷奪傾危悖理反義之

人亦幸而不暴著於世豈非所託不得其人故
 邪可不惜哉蓋史者所以明夫治天下之道也
 故為之者亦必天下之材然後其任可得而稱
 也豈可忽哉豈可忽哉臣恂臣寶臣臣穆臣藻
臣洙臣覺臣彥若臣鞏謹敘目錄昧死上具文

南齊書目錄

凡五十九卷

本紀八卷

志二十一卷

列傳四十卷

本紀第一

南齊書一

本紀第二

南齊書二

本紀第三

南齊書三

高帝下

本紀第三

南齊書三

本紀武帝

南齊書二

本紀第四

南齊書四

本紀鬱林王

南齊書一

本紀第五

南齊書五

海陵王

本紀第六

南齊書六

明帝

本紀第七

南齊書七

東昏侯

本紀第八

南齊書八

和帝

志第一

南齊書九

禮上

志第二

南齊書十

禮下

志第三

南齊書十一

樂

南齊書十二

志第四

南齊書十二

志第五 天文上

南齊書十一

志第六 天文下

南齊書十三

志第七 州郡上

南齊書十四

志第八 州郡下

南齊書十五

志第九 百官

南齊書十六

志第十 輿服

南齊書十七

志第十一 祥瑞

南齊書十八

志第十二 五行

南齊書十九

志第十三 列傳第一

南齊書二十

皇后

南齊書二十一

宣孝陳皇后

高昭劉皇后

武穆裴皇后

文安王皇后

鬱林王何妃

海陵王王妃

明敬劉皇后

東昏褚皇后

和帝王皇后

列傳第二

南齊書二十一

文惠太子

列傳第三

南齊書二十二

豫章文獻王

列傳第四

南齊書二十三

褚淵

淵弟澄
徐嗣

王儉

列傳第五

南齊書二十四

柳世隆

張瓌

列傳第六

南齊書二十五

垣崇祖

張敬兒

列傳第七

南齊書二十六

王敬則

陳顯達

列傳第八

南齊書二十七

劉懷珍

南安書二十八

王玄載

弟玄邈

列傳第九

南齊書二十八

崔祖思

劉善明

蘇侃

南垣榮祖

列傳第十

南齊書二十九

呂安國

全景文

周山圖

周盤龍

王廣之

列傳第十一

南齊書三十

薛淵

戴僧靜

栢康

焦度

曹虎

列傳第十二

南齊書三十一

江謐

荀伯玉

列傳第十三

南齊書三十二

王琨

張岱

褚炫

何戢

王延之

阮韜

列傳第十四

南齊書三十三

王僧虔

張緒

列傳第十五

南齊書三十四

虞玩之

劉休

沈沖

庾杲之

王謏

列傳第十六

南齊書三十五

高祖十二王

臨川獻王映

長沙威王晃

武陵昭王曩

安成恭王暕

鄱陽王鏘

桂陽王鑠

始興簡王鑑

江夏王鋒

南平王鈇

宜都王鑑

晉熙王鈇

河東王鉉

列傳第十七

南齊書三十六

謝超宗

劉詳

列傳第十八

南齊書三十七

劉到撫

劉悛

虞棕

胡諧之

列傳第十九

南齊書三十八

蕭景先

蕭赤斧子穎曹

列傳第二十

南齊書三十九

劉瓛弟璉

陸澄

列傳第二十一

南齊書四十

武帝一十七王

竟陵文宣王子良子胃

廬陵王子鄉

魚復侯子響

安陸王子敬

晉安王子懋

隨郡王子隆

建安王子真

西陽王子明

南海王子罕

巴陵王子倫

邵陵王子貞

臨賀王子岳

西陽王子文

衡陽王子峻

南康王子琳

湘東王子建

南郡王子夏

列傳第二十二

南齊書四十一

張融

周顥

列傳第二十三

南齊書四十二

王晏

蕭湛

蕭坦之

江祐

列傳第二十四

南齊書四十三

江斡

何昌寓

謝瀹

王思遠

列傳第二十五

南齊書四十四

徐孝嗣

沈文季

列傳第二十六

南齊書四十五

宗室

衡陽元王道度

始安貞王道生

遙光
遙昌

遙欣

安陸昭王緬

列傳第二十七

南齊書四十六

王秀之

王慈

蔡約

陸慧曉

顧憲之

蕭惠基

列傳第二十八

南齊書四十七

王融

謝朓

列傳第二十九

南齊書四十八

袁象

孔稚珪

劉繪

列傳第三十

南齊書四十九

王奂

從弟績

張沖

列傳第三十一

南齊書五十

文二王

巴陵王昭秀

桂陽王昭粲

明七王

巴陵隱王贊義

江夏王寶玄

廬陵王寶融

鄱陽王寶寅

邵陵王寶融

晉熙王寶高

桂陽王寶融

列傳第三十二

南齊書五十一

裴叔業

崔慧景

張欣泰

列傳第三十三

南齊書五十二

文學

丘靈鞠

檀超

卞彬

丘巨源

王智深

陸厥

崔慰祖

王遂之

祖冲之

賈淵

列傳第三十四

南齊書五十三

良政

傅琰

虞愿

劉懷恩

裴昭明

沈憲

李珪之

孔琇之

列傳第三十五

南齊書五十四

高逸

褚伯玉

明僧紹

顧歡

臧榮緒

何求

劉虬

庾易

宗測

杜京產

沈麟士

吳苞

徐伯珍

列傳第三十六

南齊書五十五

孝義

崔懷慎

公孫僧遠

吳欣之

韓係伯

孫淡

華寶

韓靈敏

封延伯

吳達之

王文殊

朱謙之

蕭叡明

樂頤

江泌

杜栖

陸絳

列傳第三十七

南齊書五十六

倖臣

紀僧真

劉係宗

茹法亮

呂文顯

呂文度

列傳第三十八

南齊書五十七

魏虜

列傳第三十九

南齊書五十八

蠻

東南夷

列傳第四十

南齊書五十九

芮芮虜

河南氏羗

南齊書目錄

終

重刻南齊書題辭

定字趙先生視監事修舉廢墜而尤留心于藝
 文于是陳周北齊書相繼就梓已謂南齊書漫
 漶踳訛尤甚乃躬任讎校而不佞亦執管窺一
 斑刻甫竣先生遷去少司成允陽劉公來益加
 刊訂間闕文無從按補者姑仍其舊不敢以意
 增損也按齊史江淹始作十志沈約繼纂帝紀
 二十篇而此書則蕭子顯自表武帝別為之顧
 當是時奉朝請吳均亦嘗著齊春秋三十篇劉

子玄稱其該實乃曾鞏目錄馬端臨經籍考並不載豈武帝惡其佐命齊明語詬焚之遂不傳邪子顯於諸昆弟中雅有才氣思以著作自見然沿襲卑卑識復猥瑣晁氏譏其天文但紀災祥州郡不著戶口祥瑞多載圖識曾氏譏其喜自馳騁刻彫藻績之變尤多而文益下可謂實錄蓋子顯齊宗室而北面梁者也惟齊宗室也故於齊之始基多溢美惟北面梁也故於齊之末造多溢惡且以時尚瞿曇希合世主區別九

流黜儒崇釋其是非大謬于聖人殆不翅如二氏所譏已也第江淹沈約之譔既不存而吳均春秋又不傳于後世則蕭齊一代君臣行事之得失言議之往復所可見者獨茲編而茲編之在今日獨監本耳若非及時脩緝不益將殘缺無徵哉詩云采葑采菲無以下體此先生所爲重刻意也因書以識

萬曆庚寅春三月吉日國子祭酒新安張一桂

書

監丞李衡

博士唐應龍

董廷欽

助教林煥章

趙垵

張汝翼

劉良春

學正陳王道

宋述祖

金待取

學錄敖淳

高應炗

典簿鄭子俊

典籍丘鴻漸同校

本紀第一

南齊書一

梁

臣

蕭子顯

撰

大明南京國子監

祭酒

趙用賢

高帝上

司業

張一桂同校

太祖高皇帝諱道成字紹伯姓蕭氏小諱鬪將漢相國蕭何二十四世孫也何子鄼定侯延生侍中彪彪生公府掾章章生皓皓生仰仰生御史大夫望之望之生光祿大夫育育生御史中

南齊書卷一
丞紹紹生光祿勳閔閔生濟陰太守闡闡生吳郡太守永永生中山相苞苞生博士周周生鮑丘長矯矯生州從事遠遠生孝廉休休生廣陵府丞豹豹生太中大夫裔裔生淮陰令整整生卽丘令雋雋生輔國參軍樂子宋昇明二年九月贈太常生皇考蕭何居沛侍中彪免官居東海蘭陵縣中都鄉中都里晉元康元年分東海爲蘭陵郡中朝亂淮陰令整字公齊過江居晉陵武進縣之東城里寓居江左者皆僑置本土

加以南名於是爲南蘭陵人也皇考諱承之字嗣伯少有大志才力過人宗人丹陽尹摹之北兗州刺史源之竝見知重初爲建威府參軍義熙中蜀賊譙縱初平皇考遷揚武將軍安固汶山二郡太守善於綏撫元嘉初徙爲威烈將軍濟南太守七年右將軍到彥之北伐大敗虜乘勝破青部諸郡國別帥安平公乙旃眷寇濟南皇考率數百人拒戰退之虜衆大集皇考使偃兵開城門衆諫曰賊衆我寡何輕敵之甚皇考

曰今日懸守窮城事已危急若復示弱必爲所屠惟當見疆待之耳虜疑有伏兵遂引去青州刺史蕭思話欲委鎮保險皇考固諫不從思話失據潰走明年征南大將軍檀道濟於壽張轉戰班師滑臺陷沒兗州刺史竺靈秀抵罪宋文帝以皇考有全城之功手書與都督長沙王義欣曰諱理民直亦不在武幹後今擬爲兗州刺史檀征南詳之皇考與道濟無素故事遂寢遷輔國鎮北中兵參軍員外郎十年蕭思話爲梁

州刺史皇考爲其橫野府司馬漢中太守氏帥楊難當寇漢川梁州刺史甄法護棄城走思話至襄陽不進皇考輕軍前行攻氏僞魏興太守薛健於黃金山剋之黃金山張魯舊戍南接漢川北枕驛道險固之極健旣潰散皇考即據之氏僞梁秦二州刺史趙溫先據州城聞皇考至退據小城薛健退屯下桃城立柴營皇考引軍與對壘相去二里健與僞馮翊太守蒲旱子悉力出戰皇考大破之健等閉營自守不敢出思

南齊紀卷一
三
話繼至賊乃稍退皇考進至峨公山爲左衛將軍沙州刺史呂平大衆所圍積日建武將軍蕭汪之平西督護段虬等至表裏奮擊大破之難當又遣息和領步騎萬餘人夾漢水兩岸援趙溫攻逼皇考相拒四十餘日賊皆衣犀甲刀箭不能傷皇考命軍中斷槩長數尺以大斧搃其後賊不能當乃焚營退皇考追至南城衆軍自後而進連戰皆捷梁州平詔曰諱稟命先驅蒙險深入全軍屢尅奮其忠果可龍驤將軍隨府

轉寧朔司馬太守如故入爲太子屯騎校尉文帝以平氏之勞青州缺將欲授用彭城王義康秉政皇考不附乃轉爲江夏王司徒中兵參軍龍驤將軍南泰山太守封晉興縣五等男邑三百四十戶遷右軍將軍元嘉二十四年殂年六十四梁土民思之於峨公山立廟祭祀昇明二年贈散騎常侍金紫光祿大夫太祖以元嘉四年丁卯歲生姿表英異龍顏鍾聲鱗文遍體儒士雷次宗立學於鷄籠山太祖年十三受業治

禮及左氏春秋十七年宋大將軍彭城王義康
被黜鎮豫章皇考領兵防守太祖舍業南行十
九年竟陵蠻動文帝遣太祖領偏軍討河北蠻
二十一年伐索虜至丘檻山竝破走二十三年
雍州刺史蕭思話鎮襄陽啓太祖自隨戍河北
討樊鄧諸山蠻破其聚落初爲左軍中兵參軍
二十七年索虜圍汝南戍主陳憲臺遣寧朔將
軍臧質安蠻司馬劉康祖救之文帝使太祖宣
旨授節度聞虜主拓跋燾向彭城質等回軍救

援至盱眙太祖與質別軍上胡宗之等五軍步
騎數千人前驅燾已潛過淮卒相遇於莞山下
合戰敗績緣淮奔退宗之等皆陷沒太祖還就
質固守爲虜所攻圍甚危急事寧還京師二十
九年領偏軍征仇池梁州西界舊有武興戍晉
隆安中沒屬氐武興西北有蘭臯戍去仇池二
百里太祖擊二壘皆破之遂從谷口入關未至
長安八十里梁州刺史劉秀之遣司馬馬汪助
太祖攻談堤城拔之虜僞河間公奔走虜救兵

南齊書卷一
五
至太祖軍力疲少又聞文帝崩乃燒城還南鄭
襲爵晉興縣五等男孝建初除江夏王大司馬
參軍隨府轉太宰員外郎直閣中書舍人西陵
王撫軍參軍建康令新安王子鸞有盛寵簡選
僚佐爲北軍中郎中兵參軍陳太后憂起爲武
烈將軍復爲建康令中兵如故景和世除後軍
將軍值明帝立爲右軍將軍時四方反叛會稽
太守尋陽王子房及東諸郡皆起兵明帝加太
祖輔國將軍率衆東討至晉陵與賊前鋒將程

桿孫曇瓘等戰一日破賊十二壘分軍定諸縣
晉陵太守袁標棄城走東境諸城相繼奔散徐
州刺史薛安都反彭城從子索兒寇淮陰山陽
太守程天祚舉城叛徐州刺史申令孫又降徵
太祖討之時太祖平東賊還又將南討出次新
亭前軍已發而索兒自睢陵渡淮馬步萬餘人
擊殺臺軍主孫耿縱兵逼前軍張永營告急明
帝聞賊渡遽追太祖往救之屯破釜索兒向鍾
離永遣寧朔將軍王寬據盱眙遏其歸路索兒

南齊書卷一
擊破臺軍主高道慶走之於石鼈將西歸王寬
與軍主任農夫先據白鵠澗張永遣太祖馳督
寬索兒東要擊太祖使不得前太祖鼓行結陣
直入寬壘索兒望見不敢發經數日索兒引軍
頓石梁太祖追之至葛冢候騎還云賊至太祖
乃頓軍引管分兩馬軍夾營外以待之俄頃賊
馬步奄至又推火車數道攻戰相持移日乃出
輕兵攻賊西使馬軍合擊其後賊衆大敗追奔
獲其器仗進屯石梁澗北索兒夜遣千人來斫

營營中驚太祖卧不起宣令左右案部不得動
須臾賊散太祖議欲於石梁西南高地築壘通
南道斷賊走路索兒果來爭之太祖率軍擊破
之賊馬自相踐藉死索兒走向鍾離太祖追至
黯黹而還除驍騎將軍封西陽縣侯邑六百戶
遷巴陵王衛軍司馬隨鎮會稽江州刺史晉安
王子勛遣臨川內史張淹自鄱陽嶠道入三吳
臺軍主沈思仁與僞龍驤將軍任皇鎮西參軍
劉越緒各據險相守明帝遣太祖領三千人討

之時朝廷器甲皆充南討太祖軍容寡闕乃編
糶皮爲馬具裝析竹爲寄生夜舉火進軍賊望
見恐懼未戰而走還除桂陽王征北司馬南東
海太守行南徐州事初明帝遣張永沈攸之以
衆喻降薛安都謂太祖曰吾今因此北討卿意
以爲何如太祖對曰安都才識不足狡猾有餘
若長轡緩御則必遣子入朝今以兵逼之彼將
懼而爲計恐非國之利也帝曰衆軍猛銳何往
不剋卿每杖策幸勿多言安都見兵至果引索

虜永等敗於彭城淮南孤弱以太祖爲假冠軍
將軍持節都督北討前鋒諸軍事鎮淮陰泰始
三年沈攸之吳喜北敗於睢口諸城戍大小悉
奔歸虜遂進至淮北圍角城戍主賈法度力弱
不敵諸將勸太祖渡岸救之太祖不許遣軍主
高道慶將數百張弩浮艦淮中遙射城外虜弩
一發數百箭俱去虜騎相引避之乃命進戰城
圍即解遷督南兗徐二州諸軍事南兗州刺史
持節假冠軍督北討如故五年進督兗青冀三

南齊紀卷一
州六年除黃門侍郎領越騎校尉不拜復授冠軍將軍留本任明帝常嫌太祖非人臣相而民間流言云蕭諱當爲天子明帝愈以爲疑遣冠軍將軍吳喜以三千人北使令喜留軍破釜自持銀壺酒封賜太祖太祖戎衣出門迎即酌飲之喜還帝意乃悅七年徵還京師部下勸勿就徵太祖曰諸卿闇於見事主上自誅諸弟爲太子稚弱作萬歲後計何關佗族惟應速發事緩必見疑今骨肉相害自非靈長之運禍難將與

方與卿等戮力耳拜散騎常侍太子左衛率時世祖以功當別封贛縣太祖以一門二封固辭不受詔許之增邑二百戶明帝崩遺詔爲右衛將軍領衛尉加兵五百人與尚書令袁粲護軍褚淵領軍劉劭共掌機事又別領東北選事尋解衛尉加侍中領石頭戍軍事明帝誅戮蕃戚江州刺史桂陽王休範以人凡獲全及蒼梧王立更有窺伺覬望密與左右闇人於後堂習馳馬招聚士衆元徽二年五月舉兵於尋陽收略

南齊書卷一
官民數日得士衆二萬人騎五百匹發盆口悉乘商旅船艦大雷戍主杜道欣鵠頭戍主劉譽期告變朝廷惶駭太祖與護軍褚淵征北張永領軍劉劭僕射劉秉游擊將軍戴明寶驍騎將軍阮佃夫右軍將軍王道隆中書舍人孫千齡員外郎楊運長集中書省計議莫有言者太祖曰昔上流謀逆皆因淹緩至於覆敗休範必遠懲前失輕兵急下乘我無備今應變之術不宜念遠若偏師失律則大沮衆心宜頓新亭白下

堅守官掖東府石頭以待賊千里孤軍後無委積求戰不得自然瓦解我請頓新亭以當其鋒征北可以見甲守白下中堂舊是置兵地領軍宜屯宣陽門爲諸軍節度諸貴安坐殿中右軍諸人不須競出我自前驅破賊必矣因索筆下議竝注同中書舍人孫千齡與休範有密契獨曰宜依舊遣軍據梁山魯顯間右衛若不出白下則應進頓南州太祖正色曰賊今已近梁山豈可得至新亭旣是兵衝所以欲死報國耳常

日乃可屈曲相從今不得也座起太祖顧謂劉
劬曰領軍已同鄙議不可改易乃單車白服出
新亭加太祖使持節都督征討諸軍平南將軍
加鼓吹一部治新亭城壘未畢賊前軍已至太
祖方解衣高卧以安衆心乃索白虎幡登西垣
使寧朔將軍高道慶羽林監陳顯達貞外郎王
敬則浮舸與賊水戰自新林至赤岸大破之燒
其船艦死傷甚衆賊步上新林太祖馳使報劉
劬急開大小桁撥淮中船舫悉渡北岸休範乘

肩輿率衆至壘南上遣寧朔將軍黃回馬軍士
周盤龍將步騎出壘對陣休範分兵攻壘東短
兵接戰自己至午衆皆失色太祖曰賊雖多而
亂尋破也楊運長領三齊射手七百人引彊命
中故賊不得逼城未時張敬兒斬休範首太祖
遣隊主陳靈寶送首還臺靈寶路中遇賊軍埋
首道側臺軍不見休範首愈疑懼賊衆亦不知
休範已死別率杜黑蠡急攻壘東司空主簿蕭
惠朗領數百人突入東門叫噪至堂下城上守門

兵披退太祖挺身上馬率數百人出戰賊皆推
楯而前相去數丈分兵橫射太祖引滿將發左
右將戴仲緒舉楯扞之箭應手飲羽傷百餘人
賊死戰不能當乃却衆軍復得保城與黑蠡拒
戰自晡達明日矢石不息其夜大雨鼓叫不復
相聞將士積日不得寢食軍中馬夜驚城內亂
走太祖秉燭正坐厲聲呵止之如此者數四賊
帥丁文豪設伏破臺軍於阜茨橋直至朱雀桁
劉劭欲開桁于道隆不從劭及道隆竝戰沒初

劭高尚其意託造園宅名爲東山頗忽世務太
祖謂之曰將軍以顧命之重任兼內外主上春
秋未幾諸王竝幼冲上流聲議遐邇所聞此是
將軍艱難之日而將軍深尚從容廢省羽翼一
朝事至雖悔可追劭竟不納賊進至杜姥宅車
騎典籤茅恬開東府納賊冠軍將軍沈懷明
於石頭奔散張永潰於白下宮內傳新亭亦陷
太后執蒼梧王手泣曰天下敗矣太祖遣軍主
陳顯達任農夫張敬兒周盤龍等從石頭濟淮

間道從承明門入衛宮闕休範既死典籤許公與詐稱休範在新亭士庶惶惑詣壘投名者千數太祖隨得輒燒之乃列兵登城北謂曰劉休範父子先昨皆已即戮屍在南岡下身是蕭平南諸君善見觀君等名皆已焚除勿有懼也臺分遣衆軍擊杜姥宅宣陽門諸賊皆破平之太祖振旅凱入百姓緣道聚觀曰全國家者此公也太祖與袁粲褚淵劉秉引咎解職不許遷散騎常侍中領軍都督南兖徐兖青冀五州軍事

鎮軍將軍南兖州刺史持節如故進爵爲公增邑二千戶太祖欲分其功請益粲等戶更日入直決事號爲四貴秦時有太后穰侯涇陽高陵君稱爲四貴至是乃復有焉四年加大祖尚書左僕射本官如故休範平後蒼梧王漸行凶暴南徐州刺史建平王景素少有令譽朝野歸心景素亦潛爲自全之計布款誠於太祖太祖拒而不納七月羽林監袁祗奔景素便舉兵太祖出屯玄武湖遣衆軍北討事平乃還太祖威名

既重蒼梧王深相猜忌幾加大禍陳太妃罵之
曰蕭諱有功於國今若害之後誰復爲汝著力
者乃止太祖密謀廢立

五年七月戊子帝微行出北湖常單馬先走羽
儀禁衛隨後追之於堤塘相蹈藉左右張互兒
馬墜湖帝怒取馬置光明亭前自馳騎刺殺之
因共屠割與左右作羌胡伎爲樂又於蠻岡賭
跳際夕乃還仁壽殿東阿氈屋中寢語左右楊
玉夫伺織女度報我時殺害無常人懷危懼玉

夫與其黨陳奉伯等二十五人同謀於氈屋中
取千牛刀殺蒼梧王稱敕使廂下奏伎因將首
出與王敬則敬則送太祖太祖夜從承明門乘
常所騎赤馬入殿內驚怖既知蒼梧王死咸稱
萬歲及太祖踐阼號此馬爲龍驤將軍世謂爲
龍驤赤明日太祖戎服出殿庭槐樹下召四貴
集議太祖謂劉秉曰丹陽國家重戚今日之事
屬有所歸秉讓不當太祖次讓袁粲粲又不受
太祖乃下議備法駕詣東城迎立順帝於是長

刀遮粲秉等各失色而去甲午太祖移鎮東府
與袁粲褚淵劉秉各甲仗五十人入殿丙申進
位侍中司空錄尚書事驃騎大將軍持節都督
刺史如故封竟陵郡公邑五千戶給油幢絡車
班劍三十人太祖因辭上命卽驃騎大將軍開
府儀同三司庚戌進督南徐州刺史封楊玉夫
等二十五人爵邑各有差十月戊辰又進督豫
司二州初荊州刺史沈攸之與太祖於景和世
同直殿省中以歡好以長女義興公主妻攸之

第三子元和攸之爲郢州值明帝晚運陰有異
圖自郢州遷爲荊州聚斂兵力將吏逃亡輒討
質隣伍養馬至二十餘匹皆分賦戍邏將士使
耕田而食廩財悉充倉儲荊州作部歲送數千
人仗攸之割留簿上供討四山蠻裝治戰艦數
百千艘沈之靈溪裏錢帛器械巨積朝廷畏之
高道慶家在華容假還過江陵道慶素便馬攸
之與宴飲於廳事前合馬槊道慶槊中破攸之
馬鞍攸之怒索刃槊道慶馳馬而出還都說攸

之反狀請三千人襲之朝議慮其事難濟太祖
又保持不許太祖既廢立遣攸之子司徒左長
史元琰賫蒼梧王諸虐害器物示之攸之未得
即起兵乃上表稱慶并與太祖書推功攸之有
素書十數行常韜在襖襠角云是明帝與已約
誓十二月遂舉兵其妾崔氏許氏諫攸之曰官
年已老那不爲百口計攸之指襖襠角示之稱
太后令召已下都京師恐懼乙卯太祖入居朝
堂命諸將西討平西將軍黃回爲都督前驅前

湘州刺史王蘊太后兄子少有膽力以父措名
宦不達欲以將途自奮每撫刀曰龍淵太阿汝
知我者叔父景文誡之曰阿答汝滅我門戶蘊
曰答與童烏貴賤覺異童烏景文子絢小字答
蘊小字也蘊遭母喪罷任還至巴陵停舟一月
日與攸之密相交構時攸之未便舉兵蘊乃下
達郢州世祖爲郢州長史蘊期世祖出弔因作
亂據郢城世祖知之不出蘊還至東府前又期
太祖出太祖又不出弔再計不行外謀愈固司

南齊書卷一
徒表粲尚書令劉秉見太祖威權稍盛慮不自
安與蘊及黃回等相結舉事殿內宿衛主帥無
不協同攸之反問初至太祖往石頭與粲謀議
粲稱疾不相見剋壬申夜起兵據石頭劉秉恆
怯晡時從丹陽郡載婦女入石頭朝廷不知也
其夜丹陽丞王遜告變秉從弟領軍韜及直閣
將軍卜伯興等嚴兵爲內應太祖命王敬則於
宮內誅之遣諸將攻石頭王蘊將數百精手帶
甲赴粲城門已閉官軍又至乃散衆軍攻石頭

斬粲劉秉走維檐湖蘊逃鬪場並禽斬之粲位
任雖重無經世之略踈放好酒步屨白楊郊野
間道遇一士大夫便呼與酣飲明日此人謂被
知顧到門求通粲曰昨飲酒無偶聊相要耳竟
不與相見嘗作五言詩云訪迹雖中宇循寄乃
滄州蓋其志也劉秉少以宗室清謹見知孝武
世秉弟遐坐通嫡母殷氏養女殷舌中血出衆
疑行毒害孝武使秉從弟祗諷秉啓證其事秉
曰行路之人尚不應忝今日迺可一門同盡無

容奉敕衆以此稱之故爲明帝所任蒼梧廢棄
出集議於路逢弟韞韞開車迎問秉曰今日之
事固當歸兄邪秉曰吾等已讓領軍矣韞槌臂
曰君肉中詎有血祭典籤莫嗣祖知祭謀太祖
召問嗣祖袁謀反何不啓聞嗣祖曰事主義無
二心雖死不敢泄也蘊嬖人張承伯藏匿蘊太
祖竝赦而用之黃回頓新亭聞石頭鼓噪率兵
來赴之朱雀旂有戍軍受節度不聽夜過會石
頭已平因稱救援太祖知而不言撫之愈厚遣

回西上流涕告別太祖屯閱武堂馳結軍旅閏
月辛丑詔假黃鉞率大衆出屯新亭中興堂治
嚴築壘教曰河南稱慈諒由掩齒廣漢流仁實
存殞朽近衰製茲營崇溝浚塹古墟曩隧時有
湮移深松茂草或致刊薙憑軒動懷巡隍增愴
宜竝爲收改葬并設薄祀
二年正月沈攸之攻郢城不剋衆潰自經死傳
首京邑丙子太祖旋鎮東府二月癸未進太祖
太尉增封三千戶都督南徐南兗徐兗青冀司

豫荆雍湘郢梁益廣越十六州諸軍事太祖解
驃騎辭都督不許乃表送黃鉞三月巳酉增班
劔爲四十人甲仗百人入殿丙子加羽葆鼓吹
餘竝如故辛卯太祖誅鎮北將軍黃回大明泰
始以來相承奢侈百姓成俗太祖輔政罷御府
省二尚方諸飾玩至是又上表禁民間華僞雜
物不得以金銀爲箔馬乘具不得金銀度不得
織成繡裙道路不得著錦履不得用紅色爲幡
蓋衣服不得翦綵帛爲雜花不得以綾作雜服

飾不得作鹿行錦及局脚檉柏床牙箱籠雜物
綵帛作屏鄣錦緣薦席不得私作器仗不得以
七寶飭樂器又諸雜漆物不得以金銀爲花獸
不得輒鑄金銅爲像皆須墨敕凡十七條其中
宮及諸王服用雖依舊例亦請詳衷九月丙午
進位假黃鉞都督中外諸軍事太傅領揚州牧
劔履上殿入朝不趨贊拜不名置左右長史司
馬從事中郎掾屬各四人使持節太尉驃騎大
將軍錄尚書南徐州刺史如故固辭詔遣敦勸

乃受黃鉞辭殊禮甲寅給三望車

三年正月乙巳太祖表蠲百姓逋負丙辰加前部羽葆鼓吹丁巳命太傅府依舊辟召丁卯給太祖甲仗五百人出入殿省甲午重申前命劔履上殿入朝不趨贊拜不名三月甲辰詔進位相國總百揆封十郡爲齊公備九錫之禮加璽紱遠遊冠位在諸侯王上加相國綠紱綬其驃騎大將軍楊州牧南徐州刺史如故太祖三讓公卿敦勸固請乃受甲寅策相國齊公曰天地

變通莫大乎炎涼懸象著明莫崇乎日月嚴冬播氣貞松之操自高光景時昏若華之暎彌顯是故英睿當亂而不移忠賢臨危而盡節自景和睿虐王綱弛紊太宗受命紹開中興運屬屯難四郊多壘蕭將軍震威葦下戎寔資義烈康國濟民於是乎在朕以不造以罹閔凶嗣君失德書契未紀威侮五行虔劉九縣神獸靈繹海水群飛彝器已塵宗禋誰主綴旒之殆未足爲譬豈直小宛興刺黍離作歌而已哉天贊皇宋實

啓明宰爰登寡昧纂承大業鴻緒再維閔基重
造高勲至德振古絕倫昔保衡翼殷博陸匡漢
方斯蔑如也今將授公典禮其敬聽朕命乃者
袁劉構禍寔繁有徒子房不臣稱兵協亂跨蹈
五湖憑陵吳越浮祲虧辰沈氛晦景桴鼓振於
王畿鋒鏑交乎天邑顧瞻宮掖將成茂草言念
邦國翦爲仇讎當此之時人無固志公投袂殉
難超然奮發執金板而先馳登寅車而戒路軍
政端嚴卒乘輯睦麾鉞一臨凶黨黑冰泮此則霸

業之基勤王之始也安都背叛竊據徐方敢率
犬羊陵虐淮滸索兒愚悖同惡相濟天祚無象
背順歸逆北鄙黔黎奄墜塗炭均人廢職邊師
告警公受命宗祊精貫朝日擁節和門氣踰霄
漢破釜之捷斬馘蔽野石梁之戰禽其渠帥保
境全民江陽卽序此又公之功也張淹迷昧弗
顧本朝受自南區志圖東夏潛軍間入竊覬不
虞于時江服未夷皇塗荐阻公忠誠慷慨在險
彌亮深識九變妙察五色以寡制衆所向風偃

國朝文獻卷一
三
朝廷無東顧之憂閩越有來蘇之慶此又公之
功也匈奴野心侵掠疆場前師失律王旅崩撓
灑血成川伏尸千里醜羯俯張勢振彭泗乘勝
長驅窺覩京甸冠帶之軌將湮被髮之容行及
公奉辭伐罪戒旦晨征兵車始交氛祲時蕩弔
死撫傷弘宣皇澤俾我淮肥復沾盛化此又公
之功也自茲厥後獫狁孔熾封豕長蛇重窺上
國而世故相仍師出日老戰士無臨陣之心戎
卒有懷歸之思是以下邳精甲望風振恐角城

高壘指日淪陷公眷言王事發憤忘食躬擐甲
胄視險若夷短兵纔接巨猾鳥散分疆畫界開
創青兗此又公之功也泰始之末入參禁旅任
兼軍國事同顧命桂陽負衆輕問九鼎裂冠毀
冕拔本塞源入兵萬乘之國頓戟象魏之下烈
火焚於王城飛矢集乎君屋機變儻忽終古莫
二群后憂惶元戎無主公按劔凝神則竒謀貫
世秉旄指麾則懦夫成勇曾不崇朝新亭獻捷
信宿之間宣陽底定雲霧廓清區宇康乂此又

公之功也皇室多難疊起戚蕃邗晉應韓翻爲
讎敵建平失圖興兵內侮公又指授六師義形
乎色役未踰旬朱方寧晏此又公之功也蒼梧
肆虐諸夏麋沸淫刑以逞誰則無罪火炎崑岡
玉石俱焚黔首相悲朝不謀夕高祖之業已淪
大明之軌誰嗣公遠稽殷漢之義近遵魏晉之
典猥以眇身入奉宗祏七廟清謚九區反政此
又公之功也表粲無質劉秉攜貳韜述相扇成
此亂階醜圖潛構危機竊發據有石頭志犯應

路公神謀內運霜鋒外舉妖沴載澄國塗悅穆
此又公之功也沈攸之苞禍歲月滋彰蜂目豺
聲阻兵安忍哀彼荆漢獨爲匪民乃眷西顧緬
同異域而經綸維始九伐未申長惡不悛遂逞
凶逆驅合姦回勢過虓虎朝野憂疑三軍沮氣
公秉鉞出關凝威江甸正情與皦日同亮明略
與秋雲競爽至義所感人百其心鼗鼓一麾夏
首寧謐雲梯未舉魯山剋定積年逋誅一朝顯
戮沮浦安流章臺順軌此又公之功也公有濟

天下之勲重之以明哲道庇生民志匡宇宙勩力肆心劬勞王室自東徂西靡有寧晏險阻艱難備嘗之矣若乃締構宗稷之勤造物資始之澤雲布霧散光被六幽弼予一人永清四海是以秬草騰芳於郊園景星垂暉於清漢遐方款關而慕義荒服重譯而來庭往哉邈乎無得而名焉朕聞疇庸表德前王盛典崇樹侯伯有國攸同所以文命成功玄珪顯錫姬旦秉哲曲阜啓蕃或改玉以弘風或胙土以宣化禮絕常班

寵冠羣辟爰逮桓文車服異數惟公勲業超於先烈而褒賞闕於舊章古今之道何其爽歟靜言欽歎良有缺然今進授相國以青州之齊郡徐州之梁郡南徐州之蘭陵魯郡琅邪東海晉陵義興揚州之吳郡會稽凡十郡封公爲齊公錫茲玄土苴以白茅定爾邦家用建冢社斯實尚父故藩世作盟主紀綱侯甸率由舊則往者周召建國師保兼任毛畢執珪入作卿士內外之寵同規在昔今命使持節兼太尉侍中中書

南齊書卷一
監司空衛將軍雲都縣開國侯淵授公相國印
綬齊公璽紱持節兼司空守尚書令僧虔授齊
公茅土金虎符第一至第五左竹使符第一至
第十左相國位總百辟秩踰三事職以禮移號
隨事革其以相國摠百揆去錄尚書之稱送所
假節侍中貂蟬中外都督太傅太尉印綬竟陵
公印策其驃騎大將軍揚州牧南徐州刺史如
故又加公九錫其敬聽後命以公執禮弘律儀
形區宇遐邇一體人無異業是用錫公大輅戎

輅各一玄牡二駟公崇修南畝所寶惟穀王府
充實百姓繁衍是用錫公袞冕之服赤舄副焉
公居身以謙導物以義鎔鈞庶品罔不和悅是
用錫公軒縣之樂六佾之儻公翼贊王猷聲教
遠洽蠻夷竭歡回首內附是用錫公朱戶以居
公明鑒人倫澄辨涇渭官方與能英又克舉是
用錫公納陛以登公保佑皇朝厲身化下杜漸
防萌含生夤式是用錫公虎賁之士三百人公
禦宄以刑禦姦以德君親無將將而必誅是用

錫公鈇鉞各一公鳳舉四維龍騫八表威靈所
振異域同文是用錫公彤弓一彤矢百茲弓十
茲矢千公明發載懷肅恭禋祀孝敬之重義感
靈祇是用錫公秬鬯一卣珪瓚副焉齊國置丞
相以下一遵舊式往欽哉其祇服朕命經緯乾
坤宏亮洪業茂昭爾大德闡揚我高祖之休命
太祖三讓公卿敦勸固請乃受之丁巳下令赦
國內殊死以下今月十五日昧爽以前一皆原
赦鰥寡孤獨不能自存者賜穀五斛府州所領

亦同蕩然宋帝詔齊公十郡之外隨宜除用以
齊國初建給錢五百萬布五千匹絹五千匹四
月癸酉詔進齊公爵爲王以豫州之南梁陳郡
潁川陳留南兖州之盱眙山陽秦郡廣陵海陵
南沛十郡增封使持節司空衛將軍褚淵奉策
授璽紱改立王社相國揚州牧驃騎大將軍南
徐州刺史如故丙戌命齊王冕十有二旒建天
子旌旗出警入蹕乘金根車駕六馬備五時副
車置旄頭雲罕樂儻八佾設鍾虞宮縣王世子

爲太子王女王孫爵命一如舊儀辛卯宋帝禪
位下詔曰惟德動天玉衡所以載序窮神知化
億兆所以歸心用能經緯乾坤彌綸宇宙闡揚
鴻烈大庇生民晦往明來積代同軌前王踵武
世必由之宋德湮微昏毀相襲景和騁悖於前
元徽肆虐於後三光再靈七廟將墜璇極委馭
含識知泯我文武之祚眇焉如綴靜惟此奈夕
惕疚心相國齊王天誕叡聖河嶽炳靈拯傾提
危澄氛靜亂匡濟艱難功均造物宏謀霜照祕

筭雲回旌旆所臨一麾必捷英風所拂無思不
偃表裏清夷遐邇寧謐旣而光啓憲章弘宣禮
教姦宄之類覩隆威而隔情慕善之儔仰徽猷
而增厲道邁於重華勲超乎文命蕩蕩乎無得
而稱焉是以辯髮左衽之首款關請吏木衣卉
服之長航海來庭豈惟肅慎獻楛越裳薦翬而
已哉故四隩載宅六府克和川陸効珍禎祥鱗
集卿煙玉露旦夕揚藻嘉穉芝英晷刻呈茂革
運斯炳代終彌亮負宸握樞允歸明哲固以獄

訟去宋謳歌適齊昔金政旣淪水德締構天之
曆數皎焉攸徵朕雖寡昧闡于大道稽覽隆替
爲日已久敢忘列代遺則人神至願乎便遜位
別宮敬禪于齊一依唐虞魏晉故事是日宋帝
遜于東邸備羽儀乘畫輪車出東掖門問今日
何不奏鼓吹左右莫有答者壬辰策命齊王曰
伊太古初陳萬物紛綸開耀靈以鑑品物立元
后以馭蒸人若夫容成大庭之世宓義五龍之
辰靡得而詳焉自軒黃以降墳素所紀略可言

者莫崇乎堯舜披金繩而握天鏡開玉匣而摠
地維德之休明宸居靈極期運有終歸禪與能
所以大唐遜位譖然興歌有虞揖讓卿雲發采
亮符命之攸臻坦至公以成務懷生載懌靈祇
効祉遺風餘烈光被無垠漢魏因循弗敢失墜
爰逮晉氏亦遵前儀惟我祖宗英叡勲格幽顯
從天人而齊七政凝至德而撫四維末葉不造
仍世多故日蝕星隕山淪川竭惟王聖哲淵明
榮鏡寓宙體望日之威資就雲之澤臨下以簡

御衆以寬仁育羣生義征不讓國塗荐阻弘五
慮而又寧皇緒將湮秉六術以匡濟及至權臣
內侮蕃屏陵上兵革雲翔萬邦震駭裁之以武
風綏之以文化遐邇清夷表裏肅穆戢琫戈而
事黼黻委旌門而恭儒館聲化遠洎荒服無塵
殊類同規華戎一揆是以五光來儀於軒庭九
穗含芳於郊牧象緯昭澈布新之符已顯圖讖
彪炳受終之義旣彰靈祇乃眷兆民引領朕聞
至道深微惟人是弘天命無常惟德是與所以

仰鑒玄情俯察羣望敬禪神器授帝位于爾躬
四海困窮天祿永終於戲王其允執厥中儀刑
前式以副率土之欣望命司裘而謁蒼昊奏雲
門而升圓丘時膺大禮永保洪業豈不盛歟再
命璽書曰皇帝敬問相國齊王大道之行與三
代之英朕雖闇昧而有志焉夫昏明相襲晷景
之恒度春秋遞運時歲之常序求諸天數猶且
隆替矧伊在人能無終謝是故勛華弘風於土
葉漢魏垂式於後昆昔我高祖欽明文思振民

育德皇靈眷命奄有四海晚世多難姦宄寔繁
鼗鼓宵聞元戎旦警億兆夷人啓處靡厝加以
嗣君荒怠敷虐萬方神鼎將遷寶策無主實賴
英聖匡濟艱危惟王體天則地含弘光大明竝
日月惠均雲雨國步斯梗則稜威外發王猷不
造則淵謨內昭重構閩吳再寧淮濟靜九江之
洪波卷海沂之氛沴放斥凶昧存我宗祀舊物
惟新三光改照逮至寵臣裂冠則裁以廟略荆
漢反噬則震以雷霆麾旆所臨風行草靡神筭

所指龍舉雲屬諸夏廓清戎翟思避興文偃武
闡揚洪烈明保冲昧翱翔禮樂之場撫柔黔首
咸躋仁壽之域自霜露所墜星辰所經正朔不
通人跡罕至者莫不踰山越海北面稱蕃款關
重譯脩其職貢是以禎祥發采左史載其竒玄
象垂文保章審其度鳳書表肆類之運龍圖顯
班瑞之期重以珠衡日角神姿特挺君人之義
在事必彰書不云乎皇天無親惟德是輔民心
無常惟惠之懷神祇之眷如彼蒼生之願如此

笙管變聲鍾石改調朕所以擁璇持衡傾佇明
哲昔金德旣淪而傳祚于我有宋曆數告終寔
在茲日亦以水德而傳于齊式遵前典廣詢群
議王公卿士咸曰惟宜今遣使持節兼太保侍
中中書監司空衛將軍雩都縣侯淵兼太尉守
尚書令僧虔奉皇帝璽綬受終之禮一依唐虞
故事王其允副幽明時登元后寵綏八表以酬
昊天之休命太祖三辭宋帝王公以下固請兼
太史令將作匠陳文建奏符命曰六亢位也後

漢自建武至建安二十五年一百九十六年而
禪魏魏自黃初至咸熙二年四十六年而禪晉
晉自太始至元熙二年一百五十六年而禪宋
宋自永初元年至昇明三年凡六十年咸以六
終六受六亢位也驗往揆今若斯昭著敢以職
任備陳管穴伏願順天時膺符瑞二朝百辟又
固請尚書右僕射王儉奏被宋詔遜位臣等參
議宜剋日輿駕受禪撰立儀注太祖乃許焉
史臣曰案太一九宮占推漢高五年太一在四

宮主人與客俱得吉計先舉事者勝是歲高祖
破楚晉元興二年太一在七宮太一爲帝天目
爲輔佐追脅太一是年安帝爲桓玄所逼出宮
大將在一宮參相在三宮格太一經言格者已
立政事上下格之不利有爲安居之世不利舉
動元興三年太一在七宮宋武破桓玄元嘉元
年太一在六宮不利有爲徐傅廢營陽王七年
太一在八宮關囚惡歲大小將皆不得立其年
到彥之北伐初勝後敗客主俱不利十八年太

一在二宮客主俱不利是歲氏楊難當寇梁益
永年仇池破十九年大小將皆見關不立凶其
年裴方明伐仇池剋百頃明年失之泰始元年
太一在二宮爲大小將奄擊之其年景和廢二
年太一在三宮不利先起主人勝其年晉安王
子勛反元徽二年太一在六宮先起敗是歲桂
陽王休範反竝伏誅四年太一在七宮先起者
客西北走其年建平王景素敗昇明元年太一
在七宮不利爲客安居之世舉事爲主人應發

爲客表粲沈攸之等反伏誅是歲太一在杜門
臨八宮宋帝禪位不利爲客安居之世舉事爲
主人禪代之應也

本紀第一

本紀第二

南齊書二

高帝下

臣蕭子顯撰

建元元年夏四月甲午上卽皇帝位於南郊設
壇柴燎告天曰皇帝臣諱敢用玄牡昭告皇皇
后帝宋帝陟鑒乾序欽若明命以命于諱夫肇
自生民樹以司牧所以闡極則天開元創物肆
茲大道天下惟公命不于常昔在虞夏受終上
代粵自漢魏揖讓中葉咸炳諸典謨載在方冊

南齊書卷二
水德旣微仍世多故寔賴諱匡拯之功以弘濟
于歟艱大造顛墜再構區宇宣禮明刑締仁緝
義晷緯凝象川岳表靈誕惟天人罔弗和會乃
仰協歸運景屬與能用集大命于茲辭德匪嗣
至于累仍而羣公卿士庶尹御事爰及黎獻至
于百戎僉曰皇天眷命不可以固違人神無託
不可以曠主畏天之威敢不祇從鴻曆敬簡元
辰虔奉皇符升壇受禪告類上帝以永答民衷
式敷萬國惟明靈是饗禮畢大駕還宮臨太極

前殿詔曰五德更紹帝迹所以代昌三正迭隆
王度所以改耀世有質文時或因革其資元膺
曆經道振民固以異術同揆殊流共貫者矣朕
以寡昧屬值艱季推肆勤之誠藉樂治之數賢
能悉心士民致力用獲拯溺龕暴一匡天下業
未參古功殆侔昔宋氏以陸夷有徵曆數攸及
思弘樂推永鑒崇替爰集天祿于朕躬惟志菲
薄辭弗獲昭遂欽從天人式繇景命祇月正于
文祖升禋鬯于上帝猥以寡德光宅四海纂革

代之蹤託王公之上若涉淵水罔知所濟寶祚
初啓洪慶惟新思俾利澤宣被億兆可大赦天
下改并明三年爲建元元年賜人爵二級文武
進位二等鰥寡孤獨不能自存者穀人五斛逋
租宿債勿復收有犯鄉論清議贓汙淫盜一皆
蕩滌洗除先注與之更始長徒敕繫之囚特皆
原遣亡官失爵禁錮奪勞一依舊典封宋帝爲
汝陰王築宮丹陽縣故治行宋正朔車旗服色
一如故事上書不爲表答表不稱詔降宋聖獻王

燮爲陰安公江夏王躋爲沙陽公隨王翽爲舞
陰公新興王嵩爲定襄公建安王禧爲荔浦公
郡公主爲縣君縣公主爲鄉君詔曰繼世象賢
列代盛典疇庸嗣美前載令圖宋氏通侯乃宜
隨運省替但欽德懷義尚表墳閭況功濟區夏
道光民俗者哉降差之典宜遵往制南康縣公
華容縣公可爲侯萍鄉縣侯可爲伯減戶有差
以繼劉穆之王弘何無忌後以司空褚淵爲司
徒吳郡太守柳世隆爲南豫州刺史詔曰宸運

肇創寶命惟新宜弘慶宥廣敷蠲汰劫賊餘口
沒在臺府者悉原赦諸負豐流徙普聽還本土
以齊國左衛將軍陳顯達爲中護軍中領軍王
敬則爲南兖州刺史左衛將軍李安民爲中領
軍戊戌以荊州刺史嶷爲尚書令驃騎大將軍
開府儀同三司揚州刺史冠軍將軍映爲荊州
刺史西中郎將晃爲南徐州刺史冠軍將軍垣
崇祖爲豫州刺史驃騎司馬崔文仲爲徐州刺
史斷四方上慶禮巳亥詔曰自廬井毀制農桑

易業鹽鐵妨民貨鬻傷治歷代成俗流蠹歲滋
援拯遺弊革末反本使公不專利氓無失業二
宮諸王悉不得營立屯邸封略山湖太官池籓
宮停稅入優量省置庚子詔宋帝后蕃王諸陵
宜有守衛有司奏帝陵各置長一人兵有差王
陵五人妃嬪三人五月丙午進河南王吐谷渾
拾寅號驃騎大將軍詔曰宸運革命引爵改封
宋氏第秩雖宜省替其有預効屯夷宣力齊業
者一仍本封無所減降有司奏留襄陽郡公張

敬兒等六十二人除廣興郡公沈曇亮等百二十二人改元嘉曆爲建元曆本德盛卯終未以正月卯祖十二月未臘丁未詔曰設募取將懸賞購士蓋出權宜非曰恒制頃世艱險浸以成俗且長逋逸開罪山湖是爲黥刑不辱亡竄無咎自今以後可斷衆募壬子詔封佐命文武功臣新除司徒褚淵等三十一人進爵增戶各有差乙卯河南王吐谷渾拾寅奉表貢獻丙辰詔遣大使分行四方遣兼散騎常侍十二人巡行

以交寧道遠不遣使己未汝陰王薨追謚爲宋順帝終禮依魏元晉恭帝故事辛酉陰安公劉燮等伏誅追封謚上兄道度爲衡陽元王道生爲始安貞王丙寅追尊皇考曰宣皇帝皇妣爲孝皇后妃爲昭皇后六月辛未詔相國驃騎中軍三府職可依資勞度二官若職限已盈所餘可賜滿壬申以游擊將軍周山圖爲兗州刺史乙亥詔曰宋末頻年戎寇兼災疾凋損或枯骸不收毀櫬莫掩宜速宣下埋藏營卹若標題猶

存姓字可識可卽運載致還本鄉有司奏遣外
監典事四人周行離門外三十五里爲限其餘
班下州郡無棺器標題者屬所以臺錢供事庚
辰七廟主備法駕卽于太廟詔諸將及客戮力
艱難盡勤直衛其從還宮者普賜位一階辛巳
罷荊州刺史甲申立皇太子諱斷諸州郡禮慶
見刑入重者降一等并申前赦恩百日立皇子
疑爲豫章王映爲臨川王晃爲長沙王畢爲武
陵王曷爲安成王鏘爲鄱陽王鑠爲桂陽王鑑

爲廣陵王皇孫長懋爲南郡王乙酉葬宋順帝
于遂寧陵秋七月丁未詔曰交阯比景獨隔書
朔斯乃前運方季負海不朝因迷遂往歸款莫
由曲赦交州部內李叔獻一人即撫南土文武
詳才選用并遣大使宣揚朝恩以試守武平太
守行交州府事李叔獻爲交州刺史丙辰以虜
僞茹蘆鎮主陰平公楊廣香爲沙州刺史丁巳
詔南蘭陵桑梓本鄉長蠲租布武進王業所基
復十年九月辛丑詔二吳義興三郡遭水減今

年田租乙巳以新除尚書令驃騎將軍豫章王
嶷爲荆湘二州刺史平西將軍臨川王映爲揚
州刺史丙午司空褚淵領尚書令戊申車駕幸
宣武堂宴會詔諸王公以下賦詩冬十月丙子
立彭城劉胤爲汝陰王奉宋帝後已卯車駕殷
祠太廟辛巳詔曰朕嬰綴世務三十餘歲險阻
艱難備嘗之矣末路屯夷戎車歲駕誠藉時來
之運實資士民之力宋元徽二年以來諸從軍
得官者未悉蒙祿可催速下訪隨正卽給才堪

餘任者訪洗量序若四州士庶本鄉淪陷簿籍
不存尋校無所可聽州郡保押從實除奏荒遠
闕中正者特許據軍簿奏除或戍扞邊役未由
旋反聽於同軍各立五保所隸有司時爲言列
汝陰太妃王氏薨追贈爲宋恭皇后十一月庚
子以太子左衛率蕭景先爲司州刺史辛亥立
皇太子妃裴氏甲申封功臣驃騎長史江謐等
十人爵戶各有差

二年春正月戊戌朔大赦天下以司空尚書令

褚淵爲司徒中軍將軍張敬兒爲車騎將軍中
領軍李安民爲領軍將軍中護軍陳顯達爲護
軍將軍辛丑車駕親祠南郊癸卯詔索虜寇淮
泗遣衆軍北伐內外纂嚴二月丁卯虜寇壽陽
豫州刺史垣崇祖破走之置巴州壬申以三巴
校尉明慧昭爲巴州刺史戊子以寧蠻校尉蕭
赤斧爲雍州刺史南蠻長史崔慧景爲梁南秦
二州刺史辛卯詔西境獻捷解嚴癸巳遣大使
巡慰淮肥徐豫邊民尤貧遘難者刺史二千石

量加賑卹甲午詔江西北民避難流徙者制遣
還本土蠲今年租稅單貧及孤老不能自存者
卽聽番籍郡縣押領三月丁酉以侍中西昌侯
諱爲郢州刺史戊戌以護軍將軍陳顯達爲南
兗州刺史吳郡太守張岱爲中護軍巳亥車駕
幸樂遊宴會王公以下賦詩辛丑以征虜將軍
崔思祖爲青冀二州刺史夏四月丙寅進高麗
王樂浪公高璉號驃騎大將軍五月立六門都
牆六月癸未詔昔歲水旱曲赦丹陽二吳義興

四郡遭水尤劇之縣元年以前三調未充虛列
已畢官長局吏應共償備外詳所除宥秋七月
甲寅以輔國將軍盧紹之爲青冀二州刺史戊
午皇太子妃裴氏薨閏月辛巳遣領軍將軍李
安民行淮泗庚寅索虜攻朐山青冀二州刺史
盧紹之等破走之冬十一月戊子以氏楊後起
爲秦州刺史十二月戊戌以司空褚淵爲司徒
乙巳車駕幸中堂聽訟壬子以驃騎大將軍豫
章王嶷爲司空揚州刺史前將軍臨川王映爲

荊州刺史

三年春正月壬戌朔詔王公卿士薦讜言丙子
以平北將軍陳顯達爲益州刺史貞陽公柳世
隆爲南兖州刺史皇子鋒爲江夏王領軍將軍
李安民等破虜於淮陽夏四月以寧朔將軍沈
景德爲廣州刺史六月壬子大赦逋租宿債除
減有差秋七月以冠軍將軍垣榮祖爲徐州刺
史冬十月戊子以河南王世子吐谷渾度易侯
爲西秦河二州刺史河南王

四年春正月壬戌詔曰夫膠庠之典彝倫攸先
所以招振才端啓發性緒弘宇黎氓納之軌義
是故五禮之迹可傳六樂之容不泯朕自膺曆
受圖志闡經訓且有司羣僚奏議咸集蓋以戎
車時警文教未宣思樂泮宮永言多慨今關雎
無虞時和歲稔遠邇同風華夷慕義便可式遵
前准脩建敷學精選儒官廣延國胄以江州刺
史王延之爲右光祿大夫癸亥詔曰比歲申威
西北義勇爭先殞氣寇場命盡王事戰亡蠲復

雖有恒典主者遵用每傷簡薄建元以來戰亡
賞蠲租布二十年雜役十年其不得收屍主軍
保押亦同此例以後將軍長沙王晃爲護軍將
軍中軍將軍南郡王長懋爲南徐州刺史冠軍
將軍安成王暉爲江州刺史二月乙未以冠軍
將軍桓康爲青冀二州刺史上不豫庚辰詔原
京師囚繫有差元年以前逋責皆原除三月庚
申召司徒褚淵左僕射王儉詔曰吾本布衣素
族念不到此因藉時來遂隆大業風道沾被升

平可期邁疾彌留至于大漸公等奉太子如事
吾柔遠能邇緝和內外當令太子敦穆親戚委
任賢才崇尚節儉弘宣簡惠則天下之理盡矣
死生有命夫復何言壬戌上崩于臨光殿年五
十六四月庚寅上謚曰太祖高皇帝奉梓宮於
東府前渚升龍舟丙午窆武進泰安陵上少深
有大量寬嚴清儉喜怒無色博涉經史善屬文
工草隸書奕棊第二品雖經綸夷險不廢素業
從諫察謀以威重得衆即位後身不御精細之
物敕中書舍人桓景真曰主衣中似有玉介導
此制始自大明末後泰始尤增其麗留此置主
衣政是興長疾源可卽時打碎凡復有可異物
皆宜隨例也後宮器物欄檻以銅爲飾者皆改
用鐵內殿施黃紗帳宮人著紫皮履華蓋除金
花爪用鐵迴釘每曰使我治天下十年當使黃
金與土同價欲以身率天下移變風俗上姓名
骨體及期運曆數竝遠應圖讖數十百條歷代
所未有臣下撰錄上抑而不宣盛矣

史臣曰孫卿有言聖人之有天下受之也非取之也漢高神武駿聖觀秦氏東遊蓋是雅多大言非始自知天命光武聞少公之論議亦特一時之笑語魏武初起義兵所期征西之墓晉宣不內迫曹爽豈有定霸浮橋宋氏崛起匹夫兵由義立咸皆一世推雄卒開鼎祚宋氏正位八君卜年五紀四絕長嫡三稱中興內難邊虞兵革世動太祖基命之初武功潛用泰始開運大拯時艱龍德在田見猜雲雨之迹及蒼梧暴虐釁結朝野百姓懍懍命懸朝夕權道旣行兼濟天下元功振主利器難以假人羣才戮力實懷尺寸之望豈其天厭水行固已人希木德歸功與能事極乎此雖至公於四海而運實時來無心於黃屋而道隨物變應而不爲此皇齊所以集大命也

贊曰於皇太祖有命自天同度宇宙合量山淵宋德不紹神器虛傳寧亂以武黜暴資賢庸發西疆功興北翰偏師獨克孤旅霆斷援旆東夏

職司靜亂指斧徐方時惟伐叛抗威京輦坐清
江漢文藝在躬芳塵淵塞用下以才鎮民以德
端已雄睟君臨尊默苞括四海大造家國

本紀第三

南齊書三

武帝

臣蕭子顯撰

世祖武皇帝諱賾字宣遠太祖長子也小諱龍
兒生於建康青溪宅其夜陳孝后劉昭后同夢
龍據屋上故字上焉初爲尋陽國侍郎辟州西
曹書佐出爲贛令江州刺史晉安王子勛反上
不從命南康相沈肅之繫上於郡獄族人蕭欣
祖門客栢康等破郡迎出上肅之率將吏數百

南齊書卷三
人追擊上與左右拒戰生獲肅之斬首百餘級
遂率部曲百餘人舉義兵始興相殷孚將萬兵
赴子勛於尋陽或勸上擊之上以衆寡不敵避
屯揭陽山中聚衆至三千人子勛遣其將戴凱
之爲南康相及軍主張宗之千餘人助之上引
兵向郡擊凱之別軍主程超數百人於南康口
又進擊宗之破斬之遂圍郡城凱之以數千人
固守上親率將士盡日攻之城陷凱之奔走殺
僞贛令陶冲之上卽據郡城遣軍主張應期鄧

惠真三千人襲豫章子勛遣軍主談秀之等七
千人與應期相拒於西昌築營壘交戰不能決
聞上將自下秀之等退散事平徵爲尚書庫部
郎征北中兵參軍西陽縣子帶南東莞太守越
騎校尉正貢郎劉韞撫軍長史襄陽太守別封
贛縣子邑三百戶固辭不受轉寧朔將軍廣興
相桂陽王休範反上遣軍襲尋陽至北嶠事平
除晉熙王安西諮議不拜復還郡轉司徒右長
史黃門郎沈攸之在荆楚宋朝密爲之備元徽

四年以上爲晉熙王鎮西長史江夏內史行郢州事順帝立徵晉熙王燮爲撫軍揚州刺史以上爲左衛將軍輔燮俱下沈攸之事起未得朝廷處分上以中流可以待敵卽據盆口城爲戰守之備太祖聞之喜曰此真我子也上表求西討不許乃遣偏軍援郢平西將軍黃回等皆受上節度加上冠軍將軍持節昇明二年事平轉散騎常侍都督江州豫州之新蔡晉熙二郡軍事征虜將軍江州刺史持節如故封聞喜縣侯

邑二千戶其年徵侍中領軍將軍給鼓吹一部府置佐史領石頭戍軍事尋又加持節督京畿諸軍事三年轉散騎常侍尚書僕射中軍大將軍開府儀同三司進爵爲公持節都督領軍如故給班劍二十人齊國建爲齊公世子改加侍中南豫州刺史給油絡車羽葆鼓吹增班劍爲四十人以石頭爲世子宮官置二率以下坊省服章一如東宮進爵王太子太祖卽位爲皇太子建元四年三月壬戌太祖崩上卽位大赦征

鎮州郡令長軍屯營部各行喪三日不得擅離
任都邑城守防備幢隊一不得還乙丑稱先帝
遺詔以司徒褚淵錄尚書事尚書左僕射王儉
為尚書令車騎將軍張敬兒為開府儀同三司
詔曰喪禮雖有定制先旨每存簡約內官可三
日一還臨外官間一日還臨後有大喪皆如之
丁卯以右衛將軍呂安國為司州刺史庚午以
司空豫章王疑為太尉癸酉詔曰城直之制歷
代宜同頃歲逋弛遂以萬計雖在憲宥懲而原

心可亮積年逋城可悉原蕩自茲以後申明舊
科有違糾裁庚辰詔曰比歲未稔貧窮不少京
師二岸多離其弊遣中書舍人優量賑卹夏四
月丙午以輔國將軍張倪為兗州刺史辛卯追
尊穆妃為皇后五月乙丑以丹陽尹聞喜公子
良為南徐州刺史甲戌以新除左衛將軍垣崇
祖為豫州刺史癸未詔曰頃水雨頻降潮流荐
滿二岸居民多所淹漬遣中書舍人與兩縣官
長優量賑卹六月甲申立皇太子長懋詔申壬

戊赦恩百日乙酉以鄱陽王鏘爲雍州刺史臨
汝公子卿爲郢州刺史甲午以寧朔將軍臧靈
智爲越州刺史丙申立皇太子妃王氏進封聞
喜公子良爲竟陵王臨汝公子卿爲廬陵王應
城公子敬爲安陸王江陵公子懋爲晉安王枝
江公子隆爲隨郡王皇子子真爲建安王皇孫
昭業爲南郡王戊戌詔曰水潦爲患星緯乖序
京都囚繫可剋日訊決諸遠獄委刺史以時察
判建康秣陵二縣貧民加賑賜必令周悉吳興

義興遭水縣蠲除租調癸卯以司徒褚淵爲司
空驃騎將軍秋七月庚申以衛尉蕭諱爲豫州
刺史壬戌以冠軍將軍垣榮祖爲青冀二州刺
史八月癸卯司徒褚淵薨九月丁巳以國哀故
罷國子學巳巳以前軍將軍姜伯起爲秦州刺
史辛未以征南將軍王僧虔爲左光祿大夫開
府儀同三司尚書右僕射王奐爲湘州刺史冬
十二月巳丑詔曰緣淮戍將久處邊勞三元行
始宜沾恩慶可遣中書令人宣旨臨會後每歲

皆如之庚子以太子左衛率戴僧靜爲徐州刺史

永明元年春正月辛亥車駕祠南郊大赦改元
壬子詔內外羣僚各舉朕違肆心規諫又詔王
公卿士各舉所知隨方登敘詔曰經邦之寄寔
資莅民守宰祿俸蓋有恒準往以邊虞告警故
浚時損益今區寓寧晏庶績咸熙念勤簡能宜
加優獎郡縣丞尉可還田秩太尉豫章王疑領
太子太傅護軍將軍長沙王晃爲南徐州刺史

鎮北將軍竟陵王子良爲南兖州刺史庚申以
侍中蕭景先爲中領軍壬戌立皇弟銳爲南平
王鏗爲宜都王皇子子明爲武昌王子罕爲南
海王甲子爲築青溪舊宮詔禦仗瞻履二月辛
巳以征虜將軍楊吳爲沙州刺史辛丑以隴西
公宕昌王梁彌機爲河涼二州刺史東羌王像
舒彭爲西涼州刺史三月癸丑詔曰宋德將季
風軌陵遲列宰庶邦彌失其序遷謝遄速公私
凋弊泰運初基草昧惟始思述先範永隆治根

莅民之職一以小滿爲限其有聲績剋舉厚加甄異理務無庸隨時代黜丙辰詔曰朕自丁荼毒奄便周忌瞻言負荷若墜淵壑而遠圖尚蔽政刑未理星緯失序陰陽愆度思播先澤兼酬天眷可申辛亥赦恩五十日以期訖爲始京師囚繫悉皆原宥三署軍徒優量降遣都邑鰥寡尤貧詳加賑卹戊寅詔四方見囚罪無輕重及劫賊餘口長徒勅繫悉原赦逋負督贓建元四年三月以前皆特除夏四月壬午詔曰魏矜袁

紹恩洽丘墓晉亮兩王榮覃餘裔二代弘義前載美談袁粲劉秉與先朝同獎宋室沈攸之於景和之世特有迺心雖末節不終而始誠可錄歲月彌往宜特優降粲秉前年改葬瑩兆未修材槨可爲經理令粗足周禮攸之及其諸子喪柩在西者可符荊州送反舊墓在所爲營葬事五月丁酉車騎將軍張敬兒伏誅六月丙寅詔凡坐事應覆治者在建元四年三月已前皆原宥秋七月戊戌新除左光祿大夫王僧虔加特

進九月己卯以荊州刺史臨川王映爲驃騎將軍冠軍將軍廬陵王子卿爲荊州刺史吳郡太守安陸侯緬爲郢州刺史

二年春正月乙亥以司州刺史呂安國爲南兗州刺史征北將軍竟陵王子良爲護軍將軍兼司徒征北長史劉悛爲司州刺史丙子以右光祿大夫王延之爲特進三月乙亥以吳興太守張岱爲南兗州刺史前將軍王奐爲江州刺史平北將軍呂安國爲湘州刺史戊寅以少府趙

景翼爲廣州刺史夏四月甲辰詔揚南徐南兗徐兗五州統內諸獄并豫江三州府州見囚江州尋陽新蔡兩郡繫獄竝部送還臺須候克日斷枉直緣江遠郡及諸州委刺史詳察訊已巳以寧朔將軍程法勤爲寧州刺史六月癸卯車駕幸中堂聽訟乙巳以安陸王子敬爲南兗州刺史戊申以黃門侍郎崔平仲爲青冀二州刺史秋七月癸未詔曰夫樂所自生先哲垂誥禮不忘本積代同風是以漢光遲回於南陽魏文

殷勤於譙國青溪宮體天含暉則地栖寶光定
靈源允集符命在昔期運初開經綸方遠繕築
之勞我則未暇時流事往永惟哽咽朕以寡薄
嗣奉鴻基思存締構式表王迹考星創制揆日
與功子來告畢規摹昭備宜申豐落之禮以暢
感尉之懷可克日小會甲申立皇子子倫爲巴
陵王八月丙午車駕幸舊宮小會設金石樂在
位者賦詩詔申京師獄及三署見徒量所降宥
領官職司詳賜幣帛戊申車駕幸玄武湖講武

甲子詔曰窆枯掩骼義重前誥卹老哀癯寔惟
令典朕永思民瘼弗忘鹽寤聲慙未敷物多垂
所京師二縣或有久墳毀發可隨宜掩埋遺骸
未覩竝加斂瘞疾病窮困不能自存者詳爲條
格竝加沾賚冬十月丁巳以桂陽王鑠爲南徐
州刺史十一月丁亥以始興王鏗爲益州刺史
三年春正月丙辰以太司農劉楷爲交州刺史
安西諮議參軍崔慶緒爲南梁秦二州刺史甲
申以晉安王子懋爲南豫州刺史辛卯車駕祠

南郊大赦都邑三百里內罪應入重者降一等
餘依赦制劾繫之身降遣有差賑卹二縣貧民
又詔曰春秋國語云生民之有學教猶樹木之
有枝葉果行育德咸必由茲在昔開運光宅華
夏方弘典謨克隆教思命彼有司崇建庠塾甫
就經始仍離屯故仰瞻徽猷歲月彌遠今遐邇
一體車軌同文宜高選學官廣延胄子又詔守
宰親民之要刺史案部所先宜嚴課農桑相土
揆時必窮地利若耕蠶殊衆足厲浮墮者所在

卽便列奏其違方驕矜佚事妨農亦以名聞將
明賞罰以勸勤怠校覈最歲竟考課以申黜
陟二月辛丑車駕祠北郊夏四月戊戌以新除
右衛將軍豫章王世子子響爲豫州刺史輔國
將軍桓敬爲兗州刺史五月乙未詔曰氓俗凋
弊于茲永久雖年穀時登而歉乏比室凡單丁
之身及癯獨而秩養養孤者竝蠲今年田租是
月省總明觀六月庚戌進河南王度易侯爲車
騎將軍秋七月辛丑詔丹陽所領及餘二百里

內見囚同集京師自此以外委州郡決斷甲戌
左光祿大夫開府儀同三司王僧虔薨丁亥以
驃騎中兵參軍董仲舒爲寧州刺史八月乙未
車駕幸中堂聽訟丁巳以行宕昌王梁彌頡爲
河涼二州刺史戊午以尚書令王儉領太子少
傅太子詹事蕭諱爲領軍將軍冬十月壬戌詔
曰皇太子諱講畢當釋奠王公以下可悉往觀
禮十一月乙丑以冠軍將軍王文仲爲青冀二
州刺史十二月丁酉詔曰九穀之重八材爲末

是故潔粢豐盛祝史無愧於辭不藉千畝周宣
所以貽諫昔期運初啓庶政草昧三推之典我
則未暇朕嗣奉鴻基思隆先軌載耒躬親率由
舊式可以開春發歲敬簡元辰鳴青鸞於東郊
冕朱紘而蒞事仰薦宗禋俯勗黔阜將使困庾
內充遺秉外芻旣富而教茲焉攸在是夏琅邪
郡旱百姓芟除枯苗至秋擢穎大熟

四年春正月甲子以南琅邪彭城二郡太守隨
郡王子隆爲江州刺史征虜長史張瓌爲雍州

刺史征虜將軍薛淵爲徐州刺史護軍將軍兼
司徒竟陵王子良進號車騎將軍富陽人唐寓
之反聚衆桐廬破富陽錢塘等縣害東陽太守
蕭崇之遣宿衛兵出討伏誅丁酉冠軍將軍馬
軍主陳天福坐討唐寓之燒掠百姓弃市辛卯
車駕幸中堂策秀才閏月癸巳立皇子子貞爲
邵陵王皇孫昭文爲臨汝公丁未以武都王楊
集始爲北秦州刺史辛亥車駕藉田詔曰夫耕
藉所以表敬親載所以率民朕景行前規躬執

良耜千畝成事六稔可期教義克宣誠感兼暢
重以天符靈貺歲月鱗萃寶鼎開玉匣之祥嘉
禾發同穗之穎甘露凝暉於坰牧神爵騫翥於
蘭囿斯乃宗稷之慶豈寡薄所臻思俾休和覃
茲黔阜見刑罪殊死以下悉原宥諸逋負在三
年以前尤窮弊者一皆蠲除孝悌力田詳授爵
位孤老貧窮賜穀十石凡欲附農而糧種闕乏
者竝加給貸務在優厚癸丑以始興內史劉勅
爲廣州刺史甲寅以藉田禮畢車駕幸閱武堂

勞酒小會詔賜王公以下在位者帛有差戊午
車駕幸宣武堂講武詔曰今親閱六師少長有
禮領馭羣帥可量班賜二月己未立皇弟鈔爲
晉熙王鉉爲河東王庚寅以光祿大夫王玄載
爲兖州刺史二月辛亥國子講孝經車駕幸學
賜國子祭酒博士助教綰各有差夏四月丁亥
以尚書左僕射柳世隆爲湘州刺史臨沂縣麥
不登刈爲馬芻至夏更苗秀五月癸巳詔楊南
徐二州今年戶租三分二取見布一分取錢來

歲以後遠近諸州輸錢處竝減布直匹准四百
依舊折半以爲永制丙午以吳興太守西昌侯
諱爲中領軍秋八月辛酉以鎮南長史蕭惠休
爲廣州刺史九月甲寅以征虜將軍王廣之爲
徐州刺史冬十二月乙亥以東中郎司馬崔慧
景爲司州刺史

五年春正月戊子以太尉豫章王疑爲大司馬
車騎將軍竟陵王子良爲司徒驃騎將軍臨川
王映衛將軍王儉中軍將軍王敬則竝本號開

府儀同三司都官尚書沈文季爲郢州刺史左將軍安陸王子敬爲荊州刺史征虜將軍晉安王子懋爲南兗州刺史輔國將軍建安王子真爲南豫州刺史辛卯詔曰朕昧爽丕顯思康民瘼雖年穀亟登而飢饉代有今履端肇運陽和告始宜協時休覃茲黎庶諸孤老貧病竝賜糧餼遣使親賦每存均普雍司二州蠻虜屢動丁酉遣丹陽尹蕭景先出平陽護軍將軍陳顯達出宛葉二月戊子車駕幸芳林園禊宴丁未以

護軍將軍陳顯達爲雍州刺史夏四月車駕殷祠太廟詔繫囚見徒四歲刑以下悉原遣五年減爲三歲京邑罪身應入重降一等六月辛酉詔曰比霖雨過度水潦洊溢京師居民多離其弊遣中書舍人二縣官長隨宜賑賜秋七月戊申詔丹陽屬縣建元四年以來至永明三年所逋田租殊爲不少京甸之內宜加優貸其非中貧者可悉原停八月乙亥詔今夏雨水吳興義興二郡田農多傷詳蠲租調九月己丑詔曰九

日出商飆館登高宴羣臣辛卯車駕幸商飆館館上所立在孫陵岡世呼爲九日臺者也丙午詔曰善爲國者使民無傷而農益勸是以十一而稅周道克隆開建常平漢載惟穆岱吠絲泉浮汶來貢杞梓皮革必緣楚往自水德將謝喪亂彌多師旅歲興饑饉代有貧室盡於課調泉貝傾於絕域軍國器用動資四表不因厥產咸用九賦雖有交貿之名而無潤私之實民咨塗炭寔此之由昔在開運星紀未周餘弊尚重農

桑不殷於曩日粟帛輕賤於當年工商罕兼金之儲匹夫多飢寒之患良由園法久廢上幣稍寡所謂民失其資能無匱乎凡下貧之家可蠲三調二年京師及四方出錢億萬糴米穀絲綿之屬其和價以優黔首遠邦嘗市雜物非土俗所產者皆悉停之必是歲賦攸宜都邑所乏可見直和市勿使逋刻冬十月甲申以中領軍西昌侯諱爲豫州刺史侍中安陸侯緬爲中領軍初起新林苑

六年春正月壬午以祠部尚書安成王暉爲南
徐州刺史詔二百里內獄同集京師尅日聽覽
自此以外委州郡訊察三署徒隸詳所原釋三
月巳亥以豫章王世子子響爲巴東王癸卯以
光祿大夫周盤龍爲行兗州刺史五月甲午以
宕昌王梁彌承爲河涼二州刺史六月甲寅以
散騎常侍沈景德爲徐州刺史丙子以始興太
守法房乘爲交州刺史秋七月乙巳都官尚書
呂安國爲領軍將軍八月乙卯詔吳興義興水

潦被水之鄉賜痼疾篤癘口二斛老疾二斛小
口五斗九月壬寅車駕幸琅邪城講武習水步
軍冬十月庚申立冬初臨太極殿讀時令辛酉
以祠部尚書武陵王暉爲江州刺史閏月乙卯
詔曰北交北徐豫司青冀八州邊接疆場民多
懸罄原永明以前所逋租調辛卯以尚書僕射
王奐爲領軍將軍十一月乙卯以羽林監費延
宗爲越州刺史庚申以後將軍晉安王子懋爲
湘州刺史西陽王子明爲南兗州刺史

七年春正月丙午以中軍將軍王敬則爲豫州
刺史中軍將軍陰智伯爲梁南秦二州刺史戊
申詔曰雍州頻歲戎役兼水旱爲弊原四年以
前逋租辛亥車駕祠南郊大赦京邑貧民普加
賑賜又詔曰春頒秋斂萬邦所以惟懷柔遠能
邇兆民所以允殖鄭渾宰邑因姓立名王濬剖
符戶口殷盛今產子不育雖炳常禁比聞所在
猶或有之誠復禮以貧殺抑亦情由俗淡宜節
以嚴威敦以惠澤主者尋舊制詳量附定蠲郵

之宜務存優厚壬戌驃騎將軍開府儀同三司
臨川王映薨戊辰詔曰諸大夫年秩隆重祿食
殊薄豈所謂下車惟舊趨橋敬老可增俸詳給
見役二月丙子以左衛將軍巴東王子響爲中
護軍己丑詔曰宣尼誕敷文德峻極自天發輝
七代陶鈞萬品英風獨舉素王誰匹功隱於當
年道深於日月感麟厭世緬邈千祀川竭谷虛
丘夷淵塞非但洙泗湮淪至乃饗嘗之主前王
敬仰崇脩寢廟歲月亟流鞠爲茂草今學敷興

立實稟洪規撫事懷人彌增欽屬可改築宗祊
務在爽塏量給祭秩禮同諸侯奉聖之爵以時
紹繼壬寅以丹陽尹王晏爲江州刺史癸卯以
巴陵王子倫爲豫州刺史三月丁未以太子右
衛率王玄邈爲兗州刺史庚戌以中護軍巴東
王子響爲江州刺史中書令隨郡王子隆爲中
護軍甲寅立皇子子岳爲臨賀王子峻爲廣漢
王子琳爲宣城王子珉爲義安王夏四月戊寅
詔曰婚禮下達人倫攸始周官設媒氏之職國

風興及時之詠四爵內陳義不期後三鼎外列
事豈存奢晚俗浮麗歷茲永久每思懲革而民
未知禁乃聞同牢之費華泰尤甚膳羞方丈有
過王侯富者扇其驕風貧者恥躬不逮或以供
帳未具動致推遷年不再來盛時忽往宜爲節
文頒之士庶竝可擬則公朝方標供設合鬻之
禮無虧寧儉之義斯在如故有違繩之以法五
月乙巳尚書令衛將軍開府儀同三司王儉薨
甲子以新除尚書左僕射柳世隆爲尚書令六

月丁亥車駕幸琅邪秋八月庚子以左衛將軍建安王子真爲中護軍冬十月己丑詔曰三季澆浮舊章陵替吉凶奢靡動違矩則或裂錦繡以競車服之飾塗金鏤石以窮瑩域之麗至班白不婚露棺累葉苟相姱銜罔顧大典可明爲條制嚴勒所在悉使畫一如復違犯依事糾奏十二月己亥以中護軍建安王子真爲郢州刺史江州刺史巴東王子響爲荊州刺史前安西司馬垣榮祖爲兗州刺史

八年春正月庚子征西大將軍王敬則進號驃騎大將軍左將軍沈文季爲領軍將軍丹陽尹鄱陽王鏘爲江州刺史詔放遣隔城虜俘聽還本上壬辰零陵王司馬藥師薨夏四月戊辰詔公卿已下各舉所知隨才授職進得其人受登賢之賞薦非其才獲濫舉之罰秋七月辛丑以會稽太守安陸侯緬爲雍州刺史癸卯詔曰陰陽舛和緯象愆度儲胤嬰患淹歷旬晷思仰祇天戒俯紓民瘼可大赦天下癸亥詔司雍二州

比歲不稔雍州八年以前司州七年以前逋租
悉原汝南一郡復限更申五年八月丙寅詔京
邑霖雨既過居民汎濫遣中書舍人二縣官長
賑卹乙酉以行河南王世子休留成爲秦河二
州刺史壬辰以左衛將軍隨郡王子隆爲荊州
刺史巴東王子響有罪遣丹陽尹蕭諱率軍討
之子響伏誅冬十月丁丑詔吳興水淹過度開
所在倉賑賜癸巳原建元以前逋租十一月乙
卯以建武將軍伏登之爲交州刺史十二月乙

丑以振威將軍陳僧授爲越州刺史戊寅詔尚
書丞郎職事繁劇卹俸未優可量增賜祿巳卯
皇子子建爲湘東王癸巳以監青冀二州軍行
刺史事張冲爲青冀二州刺史

九年春正月甲午以侍中江夏王鋒爲南徐州
刺史冠軍將軍劉俊爲益州刺史辛丑車駕祠
南郊詔京師見囚繫詳量原遣三月乙卯以南
中郎司馬劉楷爲司州刺史辛丑以太子左衛
率劉纘爲廣州刺史夏四月乙亥有司奏舊格

南齊書卷三
一年兩過行陵三月十五日曹郎以下小行九月十五日司空以下大行今長停小行唯二州一大行詔曰可六月甲戌以尚書左僕射王奐爲雍州刺史秋九月戊辰車駕幸琅邪城講武觀者傾都普頒酒肉

十年春正月戊午詔諸責負衆逋七年以前悉原除高貲不在例孤老六疾人穀五斛内外有務衆官增祿俸以左民尚書南平王銳爲湘州刺史司徒竟陵王子良領尚書令右衛將軍王

玄邈爲北徐州刺史中軍將軍廬陵王子卿進號車騎將軍北中郎將南海王子罕爲交州刺史輔國將軍臨汝公昭文爲南豫州刺史冠軍將軍王文和爲北兖州刺史二月壬寅鎮軍將軍陳顯達領中領軍夏四月辛丑大司馬豫章王嶷薨五月己巳司徒竟陵王子良爲揚州刺史秋八月丙申以新城太守郭安明爲寧州刺史冬十月乙丑車駕幸玄武湖講武甲午車駕殷祠太廟十一月戊午詔曰頃者霖雨樵糧稍

貴京邑居民多離其弊遣中書舍人二縣官長賑賜

十一年春正月癸丑詔京師見繫囚詳所原遣以驃騎大將軍王敬則爲司空江州刺史鄱陽王鏘爲領軍將軍鎮軍大將軍陳顯達爲江州刺史右衛將軍崔慧景爲豫州刺史丙子皇太子長懋薨二月壬午以車騎將軍廬陵王子卿爲驃騎將軍南豫州刺史撫軍將軍安陸王子敬進號車騎將軍己丑輔國將軍曹虎爲梁南

秦二州刺史癸卯以新除中書監晉安王子懋爲雍州刺史丙午以冠軍將軍王文和爲益州刺史三月乙亥雍州刺史王奐伏誅夏四月壬午詔東宮文武臣僚可悉度爲太孫官屬甲午立皇太孫昭業太孫妃何氏詔賜天下爲父後者爵一級孝子順孫義夫節婦粟帛各有差癸卯以驍騎將軍劉靈哲爲兗州刺史五月戊辰詔曰水旱成災穀稼傷弊凡三調衆逋可同申至秋登京師二縣朱方姑孰可權斷酒庚午以

輔國將軍蕭惠休爲徐州刺史丙子以左民尚書宜都王鏗爲南豫州刺史六月壬午詔霖雨旣過遣中書舍人二縣官長賑賜京邑居民秋七月丁巳詔曰頃風水爲災二岸居民多離其患加以貧病六疾孤老稚弱彌足矜念遣中書舍人履行沾卹又詔曰水旱爲災實傷農稼江淮之間倉廩旣虛遂草竊充斥互相侵奪依阻山湖成此逋逃曲赦南兗豫司徐五州南豫川之歷陽譙臨江廬江四郡三調衆逋宿債並

原除其緣淮及青冀新附僑民復除已訖更申五年是月上不豫徙御延昌殿乘輿始登階而殿屋鳴咤上惡之虜侵邊戍辰遣江州刺史陳顯達鎮雍州樊城上慮朝野憂惶乃力疾召樂府奏正聲伎戊寅大漸詔曰始終大期賢聖不免吾行年六十亦復何恨但皇業艱難萬機重不能無遺慮耳太孫進德日茂社稷有寄子良善相毗輔思弘治道內外衆事無大小悉與諱參懷共下意尚書是職務根本悉委王

晏徐孝嗣軍旅捍邊之略委王敬則陳顯達王
廣之王玄邈沈文季張瓌薛淵等百辟庶僚各
奉爾職謹事太孫勿有懈怠知復何言又詔曰
我識滅之後身上著夏衣畫天衣純烏犀導應
諸器服悉不得用寶物及織成等唯裝複袂衣
各一通常所服身刀長短二口鐵環者隨我入
梓宮祭敬之典本在因心東鄰殺牛不如西家
祭我靈上慎勿以牲爲祭唯設餅茶飲干飯
酒脯而已天下貴賤咸同 制未 陵前朔望

設菜食陵墓萬世所宅意嘗恨休安陵未稱今
可用東三處地最東邊以葬我名爲景安陵喪
禮每存省約不須煩民百官停六時入臨朔望
祖日可依舊諸主六宮竝不須從山陵內殿鳳
華壽昌耀靈三處是吾所改制夫貴有天下富
兼四海宴處寢息不容乃陋謂此爲奢儉之中
慎勿壞去顯陽殿玉像諸佛及供養具如別牒
可盡心禮拜供養之應有功德事可專在中自
今公私皆不得出家爲道及起立塔寺以宅爲

精舍竝嚴斷之唯年六十必有道心聽朝賢選
序已有別詔諸小小賜乞及閣內處分亦有別
牒內外禁衛勞舊主帥左右悉付蕭諶優量驅
使之勿負吾遺意也是日上崩年五十四上剛
毅有斷爲治總大體以富國爲先頗喜遊宴雕
綺之事言常恨之未能頓遣臨崩又詔凡諸遊
費宜從休息自今遠近薦獻務存節儉不得出
界營求相高奢麗金粟繒纈弊民已多珠玉玩
好傷工尤重嚴加禁絕不得有違准 九月丙

寅葬景安陵

史臣曰世祖南面嗣業功參寶命雖爲繼體事
實艱難御袞垂旒深存政典文武授任不革舊
章明罰厚恩皆由上出義兼長遠莫不肅然外
表無塵內朝多豫機事平理職貢有恒府藏內
充民鮮勞役宮室苑囿未足以傷財安樂延年
衆庶所同幸若夫割愛懷抱同彼甸人太祖羣
昭位後諸穆昔漢武留情晚悟追恨戾園魏文
侯克中山不以封弟英賢心迹臣所未詳也

南齊書卷三
贊曰武帝丕顯徽號止戈詔嶺歆履彭派澄波
威承景曆肅御金科北懷戎款南獻夷歌市朝
晏逸中外寧和

本紀第三

南齊書三

本紀第四

南齊書四

鬱林王

臣蕭子顯撰

鬱林王昭業字元尚文惠太子長子也小名法
身世祖卽位封南郡王二千戶永明五年十一
月戊子冠於東宮崇政殿其日小會賜王公以
下帛各有差給昭業扶二人七年有司奏給班
劍二十人鼓吹一部高選友學十一年給早輪
三望車詔高選國官文惠太子薨立昭業爲皇

太孫居東宮世祖崩太孫卽位八月壬午詔稱
先帝遺詔以護軍將軍武陵王曄爲衛將軍征
南大將軍陳顯達卽本號並開府儀同三司尚
書左僕射西昌侯諱爲尚書令太孫詹事沈文
季爲護軍將軍癸未以司徒竟陵王子良爲太
傅詔曰朕以寡薄嗣膺寶政對越靈命欽若前
圖思所以敬守成規拱揖羣后哀荒在日有憎
大猷宜育德振民光昭睿範凡逋三調及衆債
在今年七月三十日前悉同蠲除其備償封籍

貨鬻未售亦皆還主御府諸署池田邸治興廢
訟事本施一時於今無用者詳所罷省公宜權
禁一以還民關市征賦務從優減丙戌詔曰近
北掠餘口悉充軍實刑故無小罔或攸赦撫辜
興仁事深睿範宜從蕩宥許以自新可一同放
遣還復民籍已賞賜者亦皆爲贖辛丑詔曰往
歲蠻虜協謀志擾邊服羣帥授略大殲凶醜革
城克捷及舞陰固守二處勞人未有沾爵賞者
可分遣選部往彼序用九月癸丑詔東西二省

府國長老所積財單祿寡良以矜懷選部可甄
才品能推校年月邦守邑丞隨宜量處以貧爲
先辛酉追尊文惠皇太子爲世宗文皇帝冬十
月壬寅尊皇太孫太妃爲皇太后立皇后何氏
十一月辛亥立臨汝公昭文爲新安王曲江公
昭秀爲臨海王皇弟昭粲爲永嘉王

隆昌元年春正月丁未改元大赦加太傅竟陵
王子良殊禮驍騎將軍晉熙王鈺爲郢州刺史
丹陽尹安陸王子敬爲南兖州刺史征北大將

軍晉安王子懋爲江州刺史臨海王昭秀爲荆
州刺史永嘉王昭粲爲南徐州刺史征南大將
軍陳顯達進號車騎大將軍郢州刺史建安王
子真爲護軍將軍詔百僚極陳得失又詔王公
以下各舉所知戊申以護軍將軍沈文季爲領
軍將軍己酉以前將軍曹虎爲雍州刺史右衛
將軍薛淵爲司州刺史庚戌以寧朔將軍蕭懿
爲梁南秦二州刺史輔國長史申希祖爲交州
刺史辛亥車駕祠南郊詔曰執耜斲耜忘懸罄比

室秉機或惰無褐終年非怠非荒雖由王道不
稂不莠實賴民和頃歲多稼無爽遺乘如積而
三登之美未臻萬斯之基尚遠且風土異宜百
民舛務刑章治緒未必同源妨本害政事非一
揆冕旒屬念無忘夙興可嚴下州郡務滋耕殖
相畝闢疇廣開地利深樹國本克阜天民又詢
訪獄市博聽謠俗傷風損化各以條聞主者詳
爲條格戊午車駕拜景安陵己巳以新除黃門
侍郎周奉叔爲青州刺史二月辛卯車駕祠明

堂夏四月辛巳衛將軍開府儀同三司武陵王
曄薨戊子太傅竟陵王子良薨戊戌以前沙州
刺史楊炅爲沙州刺史丁酉以驃騎將軍廬陵
王子卿爲衛將軍尚書右僕射鄱陽王鏘爲驃
騎將軍竝開府儀同三司閏月乙丑以南東海
太守蕭穎胄爲青冀二州刺史丁卯鎮軍大將
軍諱卽本號開府儀同三司戊辰以中軍將軍
新安王昭文爲揚州刺史六月丙寅以黃門侍
郎王思遠爲廣州刺史秋七月庚戌以中書郎

蕭遙欣爲兗州刺史東莞太守臧靈智爲交州
刺史癸巳皇太后令曰鎮軍車騎左僕射前將
軍領軍左衛衛尉八座自我皇歷啓基受終于
宋睿聖繼軌三葉重光太祖以神武創業草昧
區夏武皇以英明提極經緯天人文帝以上哲
之資體元良之重雖功未被物而德已在民三
靈之眷方永七百之基已固嗣主特鍾沴氣爰
表弱齡險戾著于綠車愚固彰於宗正狗馬是
好酒色方湏所務唯鄙事所疾唯善人世祖慈

愛曲深每加容掩異年志稍改立守神器自入
纂鴻業長惡滋甚居喪無一日之哀縗經爲歡
宴之服昏酣長夜萬機斯壅發號施令莫知所
從闡豎徐龍駒專總樞密奉叔珍之互執權柄
自以爲任得其人表裏緝穆邁蕭曹而愈信布
倚太山而坐平原於是恣情肆意罔顧天顯二
帝姬嬪竝充寵御兩宮遺服皆納玩府內外混
漫男女無別丹屏之北爲酤鬻之所青蒲之上
開桑中之肆又微服潛行信次忘反端委以朝

虛位交戟而守空宮積旬矣宰輔忠賢盡誠奉
主誅鋤羣小與能悛革曾無克已更深怨憾公
卿股肱以異已寘戮文武昭穆以德譽見猜放
肆醜言將行屠膾社稷危殆有過綴旒昔太宗
克光於漢世簡文代興於晉氏前事之不忘後
人之師也鎮軍居正體道家國是賴伊霍之舉
實寄淵謨便可詳依舊典以禮廢黜中軍將軍
新安王體自文皇睿哲天秀宜入嗣鴻業永寧
四海外即以禮奉迎未亡人屬此多難投筆增

慨昭業少美容止好隸音世祖勅皇孫手書不
得妄出以貴重之進對音吐甚有令譽王侯五
日一問訊世祖常獨呼昭業至幄座別加撫問
呼爲法身鍾愛甚重文惠皇太子薨昭業每臨
哭輒號咷不自勝俄介暹內歡笑極樂在世祖
喪哭泣竟入後宮嘗列胡妓二部夾閣迎奏爲
南郡王時文惠太子禁其起居節其用度昭業
謂豫章王妃庾氏曰阿婆佛法言有福德生帝
王家今日見作天王便是大罪左右主帥動見

拘執不如作市邊屠酤富兒百倍矣及卽位極
意賞賜動百數十萬每見錢輒曰我昔時思汝
一文不得今得用汝未暮年之間世祖齋庫儲
錢數億垂盡開主衣庫與皇后寵姬觀之給闈
人豎子各數人隨其所欲恣意輦取取諸寶器
以相剖擊破碎之以爲笑樂居嘗裸袒著紅縠
禪雜采衲服好鬪雞密買雞至數千價世祖御
物甘草杖宮人寸斷用之毀世祖招婉殿乞闈
人徐龍駒爲齋龍駒尤親幸爲後閣舍人日夜

在六宮房內昭業與文帝幸姬霍氏淫通龍駒
勸長留宮內聲云度霍氏爲尼以餘人代之嘗
以邪諂自進每謂人曰古時亦有監作三公者
皇后亦淫亂齋閣通夜洞開內外淆雜無復分
別中書舍人綦母珍之朱隆之直閣將軍曹道
剛周奉叔竝爲帝羽翼高宗屢諫不納先啓誅
龍駒次誅奉叔及珍之帝竝不能違旣而尼媪
外入頗傳異語乃疑高宗有異志中書令何胤
以皇后從叔見親使直殿省嘗隨后呼胤爲三

父與胤謀誅高宗令胤受事胤不敢當依違杜
諫帝意復止乃謀出高宗於西州中勅用事不
復關諮高宗慮變定謀廢帝二十二日壬辰使
蕭諶坦之等於省誅曹道剛朱隆之等率兵自
尚書入雲龍門戎服加朱衣於上比入門三矢
履王晏徐孝嗣蕭坦之陳顯達王廣之沈文季
係進帝在壽昌殿聞外有變使閉內殿諸房閣
令閹人登興光樓望還報云見一人戎服從數
百人急裝在西鍾樓下須臾蕭諶領兵先入宮
截壽昌閣帝走向愛姬徐氏房拔劍自刺不中
以帛纏頸輿接出延德殿諶初入殿宿衛將士
皆操弓楯欲拒戰諶謂之曰所取自有人卿等
不須動宿衛信之及見帝出各欲自奮帝竟無
一言出西弄弑之時年二十一輿尸出徐龍駒
宅殯葬以王禮餘黨亦見誅

史臣曰鬱林王風華外美衆所同惑伏情隱詐
難以貌求立嫡以長未知瑕釁世祖之心不變
周道旣而訾鄙內作兆自宮闈雖爲害未遠足

傾社稷春秋書梁伯之過言其自取亡也
贊曰十譽有一無國不失鬱林負荷棄禮亡律
東西二省府國長老一本長字作屯疑

本紀第四

本紀第五

南齊書五

臣蕭子顯撰

海陵王

海陵恭王昭文字季尚文惠太子第二子也永
明四年封臨汝公邑千五百戶初為輔國將軍
濟陽太守十年轉持節督南豫州諸軍事南豫
州刺史將軍如故十一年進號冠軍將軍文惠
太子薨還都鬱林王即位為中軍將軍領兵置
佐封新安王邑二千戶隆昌元年為使持節都

督揚南徐二州諸軍事揚州刺史將軍如故其
年鬱林王廢尚書令西昌侯諱議立昭文爲帝
延興元年秋七月丁酉卽皇帝位以尚書令鎮
軍大將軍西昌侯諱爲驃騎大將軍錄尚書事
揚州刺史宣城郡公詔曰太祖高皇帝英謀光
大受命作齊世祖武皇帝宏猷冠世繼暉下武
世宗文皇帝清明懿鑠四海宅心竝德漏下泉
功昭上象聲教所覃無思不洽洪基式固景祚
方融而天步多阻運鍾否剝嗣君昏忍暴戾滋

多棄侮天經悖滅人紀朝野重足遐邇側視民
怨神恫宗祧如綴賴忠謨肅舉霄漢廓清俾三
后之業絕而更紐七百之慶危而復安猥以冲
人入纂乾緒載懷馭朽若墜諸淵思與黎元共
綏戩福大赦改元文武賜位二等八月甲辰以
新除衛尉蕭湛爲中領軍司空王敬則進位太
尉新除車騎大將軍陳顯達爲司空尚書左僕
射王晏爲尚書令左衛將軍王廣之爲豫州刺
史驃騎大將軍鄱陽王鏘爲司徒詔遣大使巡

行風俗丁未詔曰新安國五品以上悉與滿敘自此以下皆聽解遣其欲仕者適其所樂以驍騎將軍河東王鉉爲南徐州刺史西中郎將臨海王昭秀爲車騎將軍南徐州刺史永嘉王昭粲爲荊州刺史戊申以輔國將軍王詡爲廣州刺史中書郎蕭遙欣爲兗州刺史庚戌以車騎板行參軍李慶綜爲寧州刺史辛亥以安西將軍王玄邈爲中護軍新除後軍司馬蕭誕爲徐州刺史壬子以冠軍司馬臧靈智爲交州刺史

乙卯申明織成金薄綵花錦繡履之禁九月癸酉詔曰頃者以淮關徭戍勤瘁於行役故覃以榮階薄酬厥勞動狀淹留未集王府非所以急舍爵之典趣報功之旨便可分遣使部往彼銓用辛巳以前九真太守朱慈明爲交州刺史癸未誅新除司徒鄱陽王鏘中軍大將軍隨郡王子隆遣平西將軍王廣之誅南兗州刺史安陸王子敬於是江州刺史晉安王子懋起兵遣中護軍王玄邈討之乙未驃騎大將軍諱假黃鉞

內外纂嚴又誅湘州刺史南平王銳郢州刺史
晉熙王鈔南豫州刺史宜都王鏗丁亥以衛將
軍廬陵王子卿爲司徒撫軍將軍桂陽王鑠爲
中軍將軍開府儀同三司冬十月癸巳詔曰周
設媒官趣及時之制漢務輕徭在休息之典所
以布德弘教寬俗阜民朕君制八紘志敷九德
而習俗之風爲弊未改警言多愠無忘昏昃督
勸婚嫁宜嚴更申明必使禽幣以時標梅息怨
正廚諸役舊出州郡徵吏民以應其數公獲二

旬私累數朔又廣陵年常遞出千人以助淮戍
勞擾爲煩抑亦苞苴是育今竝可長停別量所
出諸縣使村長路都防城直縣爲劇尤深亦宜
禁斷丁酉解嚴進驃騎大將軍揚州刺史宣城
公諱爲太傅領大將軍揚州牧加殊禮進爵爲
王戊戌誅新除中軍將軍桂陽王鑠撫軍將軍
衡陽王鈞侍中祕書監江夏王鋒鎮軍將軍建
安王子真左將軍巴陵王子倫癸卯以寧朔將
軍蕭遙欣爲豫州刺史新除黃門郎蕭遙昌爲

郢州刺史輔國將軍蕭誕爲司州刺史宣城王
輔政帝起居皆諮而後行思食蒸魚菜太官令
答無錄公命竟不與辛亥皇太后令曰司空後
將軍丹陽尹右僕射中領軍八座夫明晦迭來
屯平代有上靈所以睠命心兆所以歸懷自皇
家淳耀列聖繼軌諸侯官乃百神受職而殷憂
時啓多難荐臻隆昌失德特紊人鬼非徒四海
解體乃亦九鼎將移賴天縱英輔大匡社稷崩
基重造墜典再興嗣主幼沖庶政多昧且早嬰

疋疾弗克負荷所以宗正內侮戚藩外叛覩天
視地人各有心雖三祖之德在民而七廟之危
行及自非樹以長君鎮以淵器未允天人之望
寧息奸宄之謀太傅宣城王胤體宣皇鍾慈太
祖識冠生民功高造物符表夙著謳頌有在宜
入承寶命式寧宗祏帝可降封海陵王吾當歸
老別館昔宣帝中興漢室簡文重延晉祀庶我
鴻基於茲永固言念家國感慶載懷建武元年
詔海陵王依漢東海王彊故事給虎賁旄頭畫

輪車設鍾虞官縣供奉所須每存隆厚十一月
稱王有疾數遣御師占視乃殞之給溫明祕器
衣一襲斂以衮冕之服大鴻臚監護喪事葬給
輜輶車九旒大輅黃屋左纛前後部羽葆鼓吹
挽歌二部依東海王故事謚曰恭王年十五
史臣曰郭璞稱永昌之名有二日之象而隆昌
之號亦同焉案漢中平六年獻帝即位便改元
爲光熹張讓段珪誅後改元爲昭寧董卓輔政
改元爲永漢一歲四號也晉惠帝太安二年長
沙王乂事敗成都王穎改元爲永安穎自鄴奪
河間王顥復改元爲永興一歲三號也隆昌延
興建武亦三改年號故知喪亂之軌迹雖千載
而必同矣

贊曰穆穆海陵因亡代興不先不後遭命是膺

本紀第五

南齊書五

本紀第六

南齊書五

本紀第六

南齊書六

明帝

臣蕭子顯撰

高宗明皇帝諱鸞字景栖始安貞王道生子也
 小諱玄度少孤太祖撫育恩過諸子宋泰豫元
 年為安吉令有嚴能之名補武陵王左常侍不
 拜元徽二年為永世令昇明二年為邵陵王安
 南記室參軍未拜仍遷寧朔將軍淮南宣城二
 郡太守尋進號輔國將軍太祖踐阼遷侍中封

西昌侯邑千戶建元二年爲持節督郢州司州之義陽諸軍事冠軍將軍郢州刺史進號征虜將軍世祖卽位轉度支尚書領右軍將軍永明元年遷侍中領驍騎將軍王子侯舊乘纏帷車高宗獨乘下帷儀從如素士公事混撓販食人擔火誤燒牛鼻豫章王白世祖世祖笑焉轉爲散騎常侍左衛將軍清道而行上甚悅二年出爲征虜將軍吳興太守四年遷中領軍常侍竝如故五年爲持節監豫州郢州之西陽司州之

汝南二郡軍事右將軍豫州刺史七年爲尚書右僕射八年加領衛尉十年轉左僕射十二年領右衛將軍世祖遺詔爲侍中尚書令尋加鎮軍將軍給班劍二十人隆昌元年卽本號爲大將軍給鼓吹一部親兵五百人尋又加中書監開府儀同三司鬱林王廢海陵王立爲使持節都督揚南徐二州軍事驃騎大將軍錄尚書事揚州刺史開府如故增班劍爲三十人封宣城郡公二千戶鎮東府城給兵五千人錢二百萬

布千匹九江作難假黃鉞事寧表送之尋加黃
鉞都督中外諸軍事太傅領大將軍揚州牧增
班劔爲四十人給幢絡三望車前後部羽葆鼓
吹劔履上殿入朝不趨替拜不名置左右長史
司馬從事中郎掾屬各四人封宣城王邑五千
戶持節侍中中書監錄尚書竝如故未拜太石
令廢海陵王以上入纂太祖爲第三子羣臣三
請乃受命

建武元年冬十月癸亥即皇帝位詔曰皇齊受

終建極握鏡臨宸神武重輝欽明懿鑠七百攸
長盤石斯固而王度中蹇天階荐阻嗣命多違
蕃豐孔棘宏圖景曆將墜諸淵宣德皇后遠鑒
崇替憲章舊典疇咨台揆允定靈策用集寶命
于予一人猥以虛薄纘承大業仰繫鴻丕顧臨
兆民永懷先構若履春冰寅憂夕惕罔識攸濟
思與萬國播此惟新大赦天下改元宿衛身普
轉一階其餘文武賜位二等逋租宿責換負官
物在建武元年以前悉原除劫賊餘口在臺府

者可悉原放負豐流徙竝還本鄉太尉王敬則
爲大司馬司空陳顯達爲太尉尚書令王晏加
驃騎大將軍中領軍蕭湛爲領軍將軍南徐州
刺史皇子寶義爲揚州刺史中護軍王玄邈爲
南兖州刺史新除右將軍張瓌爲右光祿大夫
平北將軍王廣之爲江州刺史乙丑詔斷遠近
上禮丁卯詔自今彫文篆刻歲時光新可悉停
省蕃牧守宰或有薦獻事非任土嚴加禁斷追
贈安陸昭侯緬爲安陸王己巳以安陸侯子寶

晁爲湘州刺史詔曰頃守職之吏多違舊典存
私害公實興民蠹今商旅稅石頭後渚及夫鹵
借倩一皆停息所在凡厥公宜可即符斷主曹
詳爲其制憲司明加聽察十一月癸酉以西中
郎長史始安王遙光爲揚州刺史晉壽太守王
洪範爲青冀二州刺史尚書令王晏領太子少
傅甲戌大司馬尋陽公王敬則等十三人進爵
邑各有差詔省新林苑先是民地悉以還主原
責本直庚辰立皇子寶義爲晉安王寶玄爲江

夏王寶源爲廬陵王寶寅爲建安王諱爲隨郡
王寶攸爲南平王甲申詔曰邑宰祿薄俸微不
足代耕雖任土恒貢亦爲勞費自今悉斷又詔
宣城國五品以上悉與滿敘自此以下皆聽解
遣其欲仕適所樂乙酉追尊始安貞王爲景皇
妃爲懿后丙戌以輔國將軍聞喜公遙欣爲荆
州刺史寧朔將軍豐城公遙昌爲豫州刺史丁
亥詔細作中署材官車府凡諸工可悉開番假
遽令休息戊子立皇太子寶卷賜天下爲父後

者爵一級孝子從孫義夫節婦普加甄賜明揚
表其衡閭贊以束帛己丑詔東宮肇建遠近或
有慶禮可悉斷之壬辰以新除征虜將軍江夏
王寶玄爲郢州刺史永明中御史中丞沈淵表
百官年登七十皆令致仕竝窮困私門庚子詔
曰日者百司耆齒許以自陳東西二省猶沾微
俸辭事私庭榮祿兼謝興言愛老實有矜懷自
縉紳年及可一遵永明七年以前銓敘之科上
輔政所誅諸王是月復屬籍各封子爲侯十二

月壬子詔曰上覽易遺下情難達是以甘棠見
美肺石流詠自月一視黃辭如有含枉不申懷
直未舉者莅民之司竝任厥失

二年春正月辛未詔京師繫囚殊死可降爲五
歲刑三署見徒五歲以下悉原赦王公以下各
舉所知隨王公卿士內外羣僚各舉朕違肆心
極諫索虜寇司豫徐梁四州壬申遣鎮南將軍
王廣之督司州征討右衛將軍蕭坦之督徐州
征討尚書右僕射沈文季督豫州征討已卯詔

京師二縣有毀發墳壠隨宜脩理又詔曰食惟
民天義高姬載蠶實生本教重軒經前哲盛範
後王茂則布令審端咸必由之朕肅宸巖廊思
引風訓深務八政永鑒在勤靜言日昃無忘寢
興守宰親民之主牧伯調俗之司宜嚴課農桑
罔令游惰揆景肆力必窮地利固脩堤防考校
殿最若耕蠶殊衆具而名聞游怠害業即便列
奏主者詳爲條格乙未虜攻鍾離徐州刺史蕭
惠休破之丙申加大尉陳顯達使持節都督西

北征討諸軍事丁酉内外纂嚴三月戊申詔南
徐州僑舊民丁多充戎旅蠲今年三課巳未司
州刺史蕭誕與衆軍擊虜破之詔雍豫司南兖
徐五州遇寇之家悉停今年稅調其與虜交通
不問往罪丙寅停青州麥租虜自壽春退走甲
申解嚴夏四月巳亥朔三百里内獄訟同集京
師尅日聽覽此以外委州郡訊察三署徒隸原
遣有差索虜圍漢中梁州刺史蕭懿拒退之巳
未以新除黃門郎裴叔業爲徐州刺史五月甲

午寢廟成詔監作長帥可賜位一等役身遣假
年非役者蠲租同假限六月壬戌誅領軍將軍
蕭湛西陽王子明南海王子罕邵陵王子貞乙
丑以右衛將軍蕭坦之爲領軍將軍秋七月辛
未以右將軍晉安王寶義爲南徐州刺史壬申
以冠軍將軍梁王爲司州刺史辛卯以氏揚馥
之爲北秦州刺史仇池公八月丁未以右衛將
軍廬陵王寶源爲南兖州刺史庚戌以新除輔
國將軍由希祖爲兖州刺史九月巳丑改封南

平王寶攸爲邵陵王蜀郡王子文爲西陽王廣漢王子峻爲衡陽王臨海王昭秀爲巴陵王永嘉王昭粲爲桂陽王冬十月丁卯詔曰軌世去奢事殷哲后訓物以儉理鏡前王朕屬流弊之末襲澆浮之季雖恭已弘化刻意隆平而禮讓未興侈華猶競永覽玄風兢言集愧思所以還淳改俗復古移民可罷東田毀興光樓并詔水衡量省御乘乙卯納皇太子妃褚氏大赦王公已下班賜各有差斷四方上禮十二月丁酉詔

曰舊國都邑望之悵然況乃自經南面負宸宸居或功濟當時德覃一世而塋壠積穢封樹不脩豈直嗟深牧豎悲甚信陵而已哉昔中京淪覆鼎玉東遷晉元締構伊始簡文遺詠在民而松門夷替埏路榛蕪雖年代殊往撫事興懷晉帝諸陵悉加脩理并增守衛吳晉陵二郡失稔之鄉蠲三調有差

三年春正月丁酉以陰平王楊昺子崇祖爲沙州刺史封陰平王北中郎將建安王寶夤爲江

州刺史巳巳詔申明守長六周之制乙酉詔去
歲索虜寇邊緣邊諸州郡將士有臨陣及疾病
死亡者竝送還本土三月壬午詔車府乘輿有
金銀飾校者皆剔除夏四月虜寇司州戍兵擊
破之五月巳巳以征虜將軍蕭懿爲益州刺史
前軍將軍陰廣宗爲梁南秦二州刺史前新除
寧州刺史李慶宗爲寧州刺史秋九月辛酉以
冠軍將軍徐玄慶爲兗州刺史冬十月以輔國
將軍申希祖爲司州刺史閏十二月戊寅皇太
子冠賜王公以下帛各有差爲父後者賜爵一
級斷遠近上禮又詔今歲不須光新可以見錢
爲百官供給

四年春正月庚午大赦詔曰嘉肴停俎定方旨
於必甘良玉在攻表珪璋於旣就是以陶鈞萬
品務本爲先經緯九區學教爲大徃因時康崇
建庠序屯虞荐有權從省廢謳誦寂寥倏移年
稔永言古昔無忘旰昃今華夏乂安要荒慕嚮
締脩東序寔允適時便可式依舊章廣延國胄

弘敷景業光被後昆壬寅詔民產子者蠲其父
母調役一年又賜米十斛新婚者蠲夫役一年
丙辰尚書令王晏伏誅二月甲子以左僕射徐
孝嗣爲尚書令征虜將軍蕭季敞爲廣州刺史
三月乙未右僕射沈文季領護軍將軍秋八月
追尊景皇所生王氏爲恭太后索虜寇河北冬
十月又寇司州甲戌遣太子中庶子梁王右軍
司馬張稷討之十一月丙辰以氏楊靈珍爲北
秦州刺史仇池公武都王丁亥詔所在結課屋

宅田桑可許減舊價十二月甲子以冠軍將軍
裴叔業爲豫州刺史冠軍將軍徐玄慶爲徐州
刺史寧朔將軍左興盛爲交州刺史丁丑遣度
支尚書崔慧景率衆救雍州

永泰元年春正月癸未朔大赦逋租宿債在四
年之前皆悉原除中軍大將軍徐孝嗣卽本號
開府儀同三司沔北諸郡爲虜所侵相繼敗沒
乙巳遣太尉陳顯達持節救雍州丁未誅河東
王鉉臨賀王子岳西陽王子文衡陽王子峻南

康王子琳永陽王子珉湘東王子建南郡王子
夏桂陽王昭粲巴陵王昭秀二月癸丑遣左衛
將軍蕭惠休假節援壽陽辛未豫州刺史裴叔
業擊虜於淮北破之辛巳平西將軍蕭遙欣領
雍州刺史三月丙午蠲雍州遇虜之縣租布戊
申詔曰仲尼明聖在躬允光上哲弘厥雅道大
訓生民師範百王軌儀千載立人斯仰忠孝攸
出玄功潛被至德彌闡雖反袂遐曠而祧薦靡
闕時祭舊品秩比諸侯頃歲以來祀典陵替俎

豆寂寥牲奠莫舉豈所以克昭盛烈永隆風教
者哉可式循舊典詳復祭秩使牢餼備禮欽饗
兼申夏四月甲寅改元赦三署囚繫原除各有
差文武賜位二等丙戌以鎮軍將軍蕭坦之爲
侍中中領軍己未立武陵昭王子子坦爲衡陽
王丙寅以西中郎長史劉暄爲郢州刺史丁卯
大司馬會稽太守王敬則舉兵反五月壬午遣
輔國將軍劉山陽率軍東討乙酉斬敬則傳首
曲赦浙東吳晉陵七郡以後軍長史蕭穎胄爲

南兖州刺史文丁酉以北中郎將司馬元和爲兖州刺史秋七月以輔國將軍王珍國爲青冀二州刺史癸卯以太子中庶子梁王爲雍州刺史太尉陳顯達爲江州刺史己酉帝崩于正福殿年四十七遺詔曰徐令可重申八命中書監本官悉如故沈文季可左僕射常侍護軍如故江祐可右僕射江祀可侍中劉暄可衛尉軍政大事委陳太尉內外衆事無大小委徐孝嗣遙光坦之江祐其大事與沈文季江祀劉暄參懷心贊

之任可委劉悛蕭惠休崔慧景葬與安陵帝明審有吏才持法無所借制御親幸臣下肅清驅使寒人不得用四幅織大存儉約罷世祖所起新林苑以地還百姓廢文帝所起太子東田斥賣之永明中輿輦舟乘悉剔取金銀還主衣庫太官進御食有裹蒸帝曰我食此不盡可四片破之餘充晚食而世祖掖庭中宮殿服御一無所改性猜忌多慮故亟行誅戮潛信道術用計數出行幸先占利害南出則唱云西行東遊則

唱云北幸簡於出入竟不南郊上初有疾無輟
聽覽祕而不傳及寢疾甚久勅臺省府署文簿
求白魚以爲藥外始知之身衣絳衣服飾皆赤
以爲厭勝巫覡云後湖水頭經過宮內致帝有
疾帝乃自至太官行水溝左右啓太官若無此
水則不立帝決意塞之欲南引淮流會崩事寢
史臣曰高宗以支庶纂曆據猶子而爲論一朝
到此誠非素心遺寄所當諒不獲免夫戕夷之
事懷抱多端或出自雄忍或生乎畏懼今同財

之親在我而先棄進引之愛量物其必遠疑怯
旣深猜似外入流涕行誅非云義舉事苟求安
能無內愧旣而自樹本根枝胤孤弱貽厥不昌
終覆宗社若令壓鈕之徵必委天命盤庚之祀
亦繼陽甲杖運推公夫何譏爾

贊曰高宗傍起宗國之慶慕名儉德垂文法令
兢兢小心察察吏政沔陽失土南風不競

本紀第六

南齊書六

南齊書六

本紀第六

南齊書卷六
本紀第六
齊高宗崩太子即位八月丁巳詔
雍州將士與虜戰死者復除有差又詔
序訪搜貧屈庚申鎮北將軍晉安王寶義進號
征北大將軍開府儀同三司南中郎將建安王

本紀第七

南齊書七

東昏侯

臣蕭子顯撰

東昏侯寶卷字智藏高宗第二子也本名明賢

高宗輔政後改焉建武元年立為皇太子永泰

元年七月巳酉高宗崩太子即位八月丁巳詔

雍州將士與虜戰死者復除有差又詔辨括選

序訪搜貧屈庚申鎮北將軍晉安王寶義進號

征北大將軍開府儀同三司南中郎將建安王

萬曆十七年

南齊書卷六

一

寶寅為郢州刺史冬十月己未詔刪省科律十一月戊子立皇后褚氏賜王公以下錢各有差永元元年春正月戊寅大赦改元詔研策秀才考課百司辛卯車駕祠南郊詔三品清資官以上應食祿者有二親或祖父母年登七十並給見錢癸卯以冠軍將軍南康王諱為荊州刺史二月癸丑以北中郎將邵陵王寶攸為南兖州刺史是月太尉陳顯達敗績於馬圈夏四月己巳立皇太子誦大赦賜民為父後爵一級甲戌

以寧朔將軍柳惔為梁南秦二州刺史五月癸亥以撫軍大將軍始安王遙光為開府儀同三司六月己酉新除右衛將軍崔慧景為護軍將軍癸亥以始興內史范雲為廣州刺史甲子詔原雍州今年三調秋七月丁亥京師大水死者眾詔賜死者材器并賑卹八月乙巳蠲京邑遇水資財漂蕩者今年調稅又詔為馬圈戰亡將士舉哀丙午揚州刺史始安王遙光據東府反詔曲赦京邑中外戒嚴尚書令徐孝嗣以下屯

衛宮城遣領軍將軍蕭坦之率六軍討之戊午
斬遙光傳首己未以征北大將軍晉安王寶玄
爲南徐兗二州刺史己巳尚書令徐孝嗣爲司
空右衛將軍劉暄爲領軍將軍閏月丙子以江
陵公寶覽爲始安王虜僞東徐州刺史沈陵降
以爲北徐州刺史九月丁未以輔國將軍裴叔
業爲兗州刺史征虜長史張沖爲豫州刺史壬
戌以頻誅大臣大赦天下辛未以太子詹事王
瑩爲中領軍冬十月乙未誅尚書令新除司空

徐孝嗣右僕射新除鎮軍將軍沈文季乙巳以
始興內史顏翻爲廣州刺史征虜將軍沈陵爲
越州刺史十一月丙辰太尉江州刺史陳顯達
舉兵於尋陽乙丑護軍將軍崔慧景加平南將
軍督衆軍南討事丙寅以冠軍將軍王鴻爲徐
州刺史十二月癸未以前輔國將軍楊集始爲
秦州刺史甲申陳顯達至京師宮城嚴警六軍
固守乙酉斬陳顯達傳首丁亥以征虜將軍邵
陵王寶攸爲江州刺史

二年春正月壬子以輔國將軍張冲爲南兖州
刺史庚午詔討豫州刺史裴叔業二月癸未以
黃門郎蕭瑒爲司州刺史丙戌以衛尉蕭懿爲
豫州刺史征壽春己丑裴叔業病死兄子植以
壽春降虜三月癸卯以輔國將軍張冲爲司州
刺史乙卯遣平西將軍崔慧景率衆軍伐壽春
夏四月丁未以新除冠軍將軍張冲爲南兖州
刺史崔慧景於廣陵舉兵襲京師壬子右衛將
軍左監盛督京邑水步衆軍南徐州刺史江夏

王寶玄以京城納慧景乙卯遣中領軍王瑩率
衆軍屯北籬門壬戌慧景至瑩等敗績甲子慧
景入京師宮內據城拒守豫州刺史蕭懿起義
救援癸酉慧景棄衆走斬首詔曲赦京邑南徐
兖二州乙亥以新除尚書右僕射蕭懿爲尚書
令丙子以晉熙王寶嵩爲南徐州刺史五月乙
巳以虜僞豫州刺史王肅爲豫州刺史戊申以
桂陽王寶貞爲中護軍己酉江夏王寶玄伏誅
壬子大赦乙丑曲赦京邑南徐兖二州戊辰以

始安王寶覽爲湘州刺史六月庚寅車駕於樂
遊苑內會如三元京邑女人放觀戊戌以新除
冠軍將軍張沖爲郢州刺史守五兵尚書陸慧
曉爲南兖州刺史秋七月甲辰以驃騎司馬張
稷爲北徐州刺史八月丁酉以新除驃騎司馬
陳伯之爲豫州刺史甲申夜宮內火冬十月己
卯害尚書令蕭懿十一月辛丑以寧朔將軍張
稷爲南兖州刺史甲寅西中郎長史蕭穎胄起
義兵於荊州十二月雍州刺史梁王起義兵於

襄陽戊寅以冠軍長史劉繪爲雍州刺史

三年春正月丙甲朔合朔時加寅漏上八刻事

畢宮人於闕武堂元會皇后正位闈人行儀帝

戎服臨視丁酉以驃騎大將軍晉安王寶義爲

司徒新除撫軍將軍建安王寶寅爲車騎將軍

開府儀同三司甲辰以寧朔將軍王珍國爲北

徐州刺史辛亥車駕祠南郊詔大赦天下百官

陳讜言二月丙寅乾和殿西廂火壬午詔遣羽

林兵征雍州中外纂嚴乙酉以威烈將軍胡元

進爲廣州刺史三月己亥以驃騎將軍沈徽孚
爲廣州刺史甲辰以輔國將軍張欣泰爲雍州
刺史丁未南康王諱即皇帝位於江陵癸丑遣
平西將軍陳伯之西征六月京邑雨水遣中書
舍人二縣官長賑賜有差蕭穎胄弟穎孚起兵
於廬陵戊子曲赦江州安成廬陵二郡秋七月
癸巳曲赦荆雍二州甲午雍州刺史張欣泰前
南譙太守王靈秀率石頭文武奉建安王寶寅
向臺至杜姥宅宮門閉乃散走己未以征虜長

史程茂爲郢州刺史驍騎將軍薛元嗣爲雍州
刺史是日元嗣以郢城降義師八月丁卯以輔
國將軍申胄監豫州事辛巳光祿大夫張環鎮
石頭辛未以太子左率李居士總督西討諸軍
事屯新亭城九月甲辰以居士爲江州刺史新
除冠軍將軍王珍國爲雍州刺史車騎將軍建
安王寶寅爲荊州刺史以輔國將軍申胄監郢
州龍驤將軍馬仙琕監豫州驍騎將軍徐元稱
監徐州是日義軍至南州申胄軍二萬人於姑

南齊書卷之六
六
熟奔歸戊申以後軍參軍蕭瓚爲司州刺史前
輔國將軍魯休烈爲益州刺史輔國長史趙越
嘗爲梁南秦二州刺史丙辰李居士與義軍戰
於新亭敗績冬十月甲戌王珍國與義軍戰於
朱雀桁敗績戊寅寧朔將軍徐元瑜以東府城
降青冀二州刺史桓和入衛屯東宮己卯衆降
光祿大夫張瓌棄石頭還宮於是閉宮城門自
守庚辰以驍騎將軍胡虎牙爲徐州刺史左軍
將軍徐智勇爲益州刺史游擊將軍牛平爲梁

南秦二州刺史李居士以新亭降琅邪城主張
木亦降義師築長圍守宮城十二月丙寅新除
雍州刺史王珍國侍中張稷率兵入殿弒帝時
年十九帝在東宮便好弄不喜書學高宗亦不
以爲非但勗以家人之行令太子求一日再入
朝發詔不許使三日一朝嘗夜捕鼠達旦以爲
笑樂高宗臨崩屬以後事以隆昌爲戒曰作事
不可在人後故委任羣小誅諸宰臣無不如意
性重澀少言不與朝士接唯親信闈人及左右

御刀應敕等自江祏始安王遙光誅後漸便騎馬日夜於後堂戲馬與親近闈人倡伎鼓叫常以五更就臥至晡乃起王侯節朔朝見晡後方前或際闈遣出臺閣案奏月數十日乃報或不知所在二年元會食後方出朝賀裁竟便還殿西序寢自巳至申百僚陪位皆僵什菜色比起就會忽遽而罷陳顯達事平漸出遊走所經道路屏逐居民從萬春門由東宮以東至于郊外數十百里皆空家盡室巷陌懸幔爲高障置伎

人防守謂之屏除或於市肆左側過親幸家環回宛轉周遍京邑每三四更中鼓聲四出幡戟橫路百姓喧走相隨士庶莫辨出輒不言定所東西南北無處不驅人高障之內設部伍羽儀復有數部皆奏鼓吹羌胡伎鼓角橫吹夜出晝反火光照天拜愛姬潘氏爲貴妃乘卧輿帝騎馬從後著織成袴褶金簿帽執七寶縛稍戎服急裝不變寒暑陵冒雨雪不避坑穽馳騁渴乏輒下馬解取腰邊蠡器酌水飲之復上馬馳去

馬乘具用錦繡處患爲雨所沾濕織雜綵珠爲覆蒙備諸雕巧教黃門五六十人爲騎客又選無賴小人善走者爲逐馬左右五百人常以自隨奔走往來略不暇息置射雉場二百九十六處翳中帷帳及步障皆給以綠紅錦金銀鏤弩牙瑇瑁帖箭郊郭四民皆廢業樵蘇路斷吉凶失時乳婦婚姻之家移產寄室或輿病棄屍不得殯葬有棄病人於青溪邊者吏懼爲監司所問推置水中泥覆其面須臾便死遂失骸骨後

宮遭火之後更起仙華神仙玉壽諸殿刻畫雕綵青葢金口帶麝香塗壁錦幔珠簾窮極綺麗繫役工匠自夜達曉猶不副速乃剔取諸寺佛刹殿藻井仙人騎獸以充足之世祖興光樓上施青漆世謂之青樓帝曰武帝不巧何不純用瑠璃潘氏服御極選珍寶主衣庫舊物不復周用貴市民間金銀寶物價皆數倍虎魄釧一隻直百七十萬京邑酒租皆折使輸金以爲金塗猶不能足下揚南徐二州橋桁塘埭丁計功爲

直歛取見錢供太樂主衣雜費由是所在塘瀆多有隳廢又訂出雉頭鶴氅白鷺縷親幸小人因緣爲姦利課一輸十郡縣無敢言者三年夏於閱武堂起芳樂苑山石皆塗以五采跨池水立紫閣諸樓觀壁上畫男女私褻之像種好樹美竹天時盛暑未及經日便就萎枯於是徵求民家望樹便取毀徹牆屋以移致之朝栽暮拔道路相繼花藥雜草亦復皆然又於苑中立市大官每旦進酒肉雜肴使宮人屠酷潘氏爲市

令帝爲市魁執罰爭者就潘氏決判帝有瞽力能擔白虎幢自製雜色錦伎衣綴以金花玉鏡衆寶逞諸意態所寵羣小黨與三十一人黃門十人初任新蔡人徐世檪爲直閣驍騎將軍凡有殺戮皆其用命殺徐孝嗣後封爲臨汝縣子陳顯達事起加輔國將軍雖用護軍崔慧景爲都督而兵權實在世檪及事平世檪謂人曰五百人軍主能平萬人都督世檪亦知帝昏縱密謂其黨茹法珍梅蟲兒曰何世天子無要人但

阿儂貨主惡耳法珍等爭權以白帝帝稍惡其
凶強以二年正月遣禁兵殺之世檟拒戰而死
自是法珍蟲兒用事竝爲外監口稱詔敕中書
舍人王咺之與相脣齒專掌文翰其餘二十餘
人皆有勢力崔慧景平後法珍封餘干縣男蟲
兒封竟陵縣男及義師起江郢二鎮已降帝遊
騁如舊謂茹法珍曰須來至白門前當一決義
師至近郊乃聚兵爲固守之計召王侯朝貴分
置尚書都座及殿省又信鬼神崔慧景事時拜

蔣子文神爲假黃鉞使持節相國太宰大將軍
錄尚書揚州牧鍾山王至是又尊爲皇帝迎神
像及諸廟雜神皆入後堂使所親巫朱光尚禱
祀祈福以冠軍將軍王珍國領三萬人據大桁
莫有鬪志遣左右直長闞豎王寶孫督戰呼爲
王長子寶孫切罵諸將帥直閣將軍席豪發憤
突陣死豪驍將旣斃衆軍於是土崩軍人從朱
雀觀上自投及赴淮死者無數於是閉城自守
城內軍事委王珍國兗州刺史張穆入衛京師

以稷爲副實甲猶七萬人帝烏帽袴褶備羽儀
登南掖門臨望又虛設鎧馬齊仗千人皆張弓
拔白出東掖門稱蔣王出盪素好鬪軍隊初使
宮人爲軍後乃用黃門親自臨陳詐被創使人
輿將去至是於閱武堂設牙門軍頓每夜嚴警
帝於殿內騎馬從鳳莊門入徽明門馬被銀蓮
葉具裝鎧雜羽孔翠寄生逐馬左右衛從晝眠
夜起如平常聞外鼓叫聲被大紅袍登景陽樓
屋上望弩幾中之衆皆怠怨不爲致力募兵出

戰出城門數十步皆坐甲而歸慮城外有伏兵
乃燒城傍諸府署六門之內皆蕩盡城中閣道
西掖門內相聚爲市販死牛馬肉帝初與羣小
計議陳顯達一戰便敗崔慧景圍城退走謂義
師遠來不過旬日亦應散去敕太官辦樵米爲
百日糧而已大桁敗後衆情兇懼法珍等恐人
衆驚走故閉城不復出軍旣而義師長圍旣立
塹柵嚴固然後出盪屢戰不捷帝尤惜金錢不
肯賞賜法珍叩頭請之帝曰賊來獨取我邪何

萬曆十六年刊
西齊紀卷七
三
為就我求物後堂儲數百具榜啓為城防帝云
擬作殿竟不與又催御府細作三百人精仗待
圍解以擬屏除金銀雕鏤雜物倍急於常王珍
國張稷懼禍及率兵入殿分軍又從西上閣入
後宮斷之御刀豐勇之為內應是夜帝在含德
殿吹笙歌作女兒子卧未熟聞兵入趨出北戶
欲還後宮清曜閣已閉闔人禁防黃泰平以刀
傷其膝仆地顧曰奴反邪直後張齊斬首送梁
王宣德太后令曰皇室受終祖宗齊聖太祖高

皇帝肇基駿命膺籙受圖世祖武皇帝係明下
武高宗明皇帝重隆景業咸降年不永宮車係
晏皇祚之重允屬儲元而稟質凶愚發於稚齒
爰自保姆迄至成童忍戾昏頑觸途必著高宗
留心正嫡立嫡惟長輔以羣才閑以賢戚內外
維持冀免多難未及朞稔便逞屠戮密戚近親
元勳良輔覆族殲門旬月相係凡所任杖盡慝
窮姦皆營伍屠販容狀險醜身秉朝權手斷國
命誅戮無辜納其財產睚眦之間屠覆比屋身

居元首好是賤事危冠短服坐卧以之晨出夜
反無復已極驅斥氓庶巷無居人老細奔遑寘
身無所東邁西屏北出南驅負疾輿屍填街塞
陌興築繕造日夜不窮晨構夕毀朝穿暮塞絡
以隋珠方斯已陋飾以璧璫曾何足道時暑赫
曦流金鑠石移竹藝果匪日伊夜根未及植葉
已先枯畚鍤紛紛勤倦無已散費國儲專事浮
飾逼奪民財自近及遠兆庶恹恹流竄道路府
帑既竭肆奪市道工商禪販行號道泣屈此萬

乘躬事角抵昂首翹肩逞能撞木觀者如堵曾
無忤容芳樂華林竝立闐闐踞肆鼓刀手銓輕
重干戈鼓譟昏曉靡息無戎而城豈足云譬至
於居喪淫讌之愆三年載弄之醜反道違常之
豐牝鷄晨鳴之慝於事已細故可得而略也罄
楚越之竹未足以言校辛癸之君豈或能匹征
東將軍忠武奮發投袂萬里光奉明聖翊成中
興乘勝席卷掃清京邑而羣小靡識嬰城自固
緩戮稽誅倏彌旬月宜速勦定寧我邦家可潛

遣間介密宣此旨忠勇齊奮過加蕩撲放斥昏
凶衛送外第未亡人不幸驟此百罹感念存沒
心焉如割奈何奈何又令依漢海昏侯故事追
封東昏侯茹法珍梅蟲兒王暄之等伏誅豐勇
之原死

史臣曰漢宣帝時南郡獲白虎獲之者張武言
武張而猛服也東昏侯亡德橫流道歸拯亂躬
當翦戮實啓太平推闡豎之名字亦天意也
贊曰東昏慢道匹癸方辛乃隳典則乃棄彝倫

玩習兵火終用焚身

本紀第七

南齊書七

本紀第八

南齊書八

和帝

臣蕭子顯撰

和帝諱寶融字智昭高宗第八子也建武元年封隨郡王邑二千戶三年為冠軍將軍領石頭戍軍事永元元年改封南康王為持節督荆雍益寧梁南北秦七州軍事西中郎將荊州刺史二年十一月甲寅長史蕭穎胄殺輔國將軍巴西梓潼二郡太守劉山陽奉梁王舉義乙卯教

纂嚴又教曰吾躬率晉陽翦此凶孽戎事方勤
宜覃澤惠所領內繫囚見徒罪無輕重殊死已
下皆原遣先有位署卽復本職將吏轉一階從
征身有家口停鎮給廩食凡諸雜役見在諸軍
帶甲之身克定之後悉免爲民其功效賞報別
有科條丙辰以雍州刺史梁王爲使持節都督
前鋒諸軍事左將軍丁巳以蕭穎胄爲右將軍
都督行留諸軍事戊午梁王上表勸進十二月
乙亥羣僚勸進並不許壬辰驍騎將軍夏侯肅

自京師至江陵稱宣德太后令西中郎將南康
王宜纂承皇祚光臨億兆方俟清宮未卽大號
可且封宣城南琅邪南東海東陽臨海新安尋
陽南郡竟陵宜都十郡爲宣城王相國荊州牧
加黃鉞置僚屬選百官西中郎府南康國並如
故須軍次近路主者詳依舊典法駕奉迎三年
正月乙巳王受命大赦唯梅蟲兒茹法珍等不
在赦例右將軍蕭穎胄爲左長史進號鎮軍將
軍梁王進號征東將軍甲戌以冠軍將軍楊公

則爲湘州刺史甲寅建牙于城南二月乙丑以
冠軍長史王茂先爲江州刺史冠軍將軍曹景
宗爲郢州刺史右將軍邵陵王寶攸爲荊州刺
史己巳羣僚上尊號立宗廟及南北郊甲申梁
王率大衆屯沔口郢州刺史張沖拒守三月丁
酉張沖死驃騎將軍薛元嗣等固守

中興元年春三月乙巳即皇帝位大赦改元文
武賜位二等鰥寡孤獨不能自存者穀人五斛
即永元三年也以相國左長史蕭穎胄爲尚書

令晉安王寶義爲司空廬陵王寶源爲車騎將
軍開府儀同三司建安王寶寅爲徐州刺史散
騎常侍夏侯詳爲中領軍領軍將軍蕭偉爲雍
州刺史丙午有司奏封庶人寶卷爲零陽侯詔
不許又奏爲涪陵王詔可乙酉尚書令蕭穎胄
行荊州刺史假梁王黃鉞壬子以征虜將軍柳
惔爲益寧二州刺史己未以冠軍將軍莊丘黑
爲梁南秦二州刺史冠軍將軍鄧元起爲廣州
刺史夏四月戊辰詔曰荆雍義舉所基實始王

迹君子勞心細人盡力宜加酬獎副其乃誠凡
東討衆軍及諸嚮義之衆可普復除五月乙卯
車駕幸竹林寺禪房宴羣臣巴西太守魯休烈
巴東太守蕭惠訓子瓚拒義軍秋七月東軍主
吳子陽十三軍救郢州屯加湖丁酉征虜將軍
王茂先擊破之辛亥以茂先爲中護軍丁卯魯
山城主孫樂祖以城降己未郢城主薛元嗣降
八月丙子平西將軍陳伯之降乙卯以伯之爲
江州刺史子虎牙爲徐州刺史九月乙未詔梁

王若定京邑得以便宜從事冬十一月乙未以
輔國將軍李元履爲豫州刺史壬寅尚書令鎮
軍將軍蕭穎胄卒以黃門郎蕭澹行荊州府州
事丁巳蕭瓚魯休烈降十二月丙寅建康城平
己巳皇太后令以梁王爲大司馬錄尚書事驃
騎大將軍揚州刺史封建安郡公依晉武陵王
遵承制故事百僚致敬壬申改封建安王寶寅
鄱陽王癸酉以司徒揚州刺史晉安王寶義爲
太尉領司徒甲戌給大司馬錢二千萬布絹各

五千匹乙酉以輔國將軍蕭宏爲中護軍

二年春正月戊戌宣德太后臨朝入居內殿大司馬梁王解承制致敬如先己亥以寧朔將軍蕭昺監南兗州壬寅以大司馬都督中外諸軍事加殊禮己酉以大司馬長史王亮爲守尚書令甲寅詔大司馬梁王進位相國總百揆揚州牧封十郡爲梁公備九錫之禮加遠遊冠位在諸王上加相國綠綬綬己未以新除右將軍曹景宗爲郢州刺史二月壬戌湘東王寶暉伏誅

戊辰詔進梁公爵爲梁王增封十郡三月乙未皇太后令給梁國錢五百萬布五千匹絹千匹辛丑鄱陽王寶寅奔虜邵陵王寶攸晉熙王寶高桂陽王寶貞伏誅甲午命梁王冕十有二旒建天子旌旗出警入蹕乘金根駕六馬備五時副車置旄頭雲罕樂舞八佾設鍾簋宮懸王子王女爵命一如舊儀庚戌以冠軍長史蕭秀爲南徐州刺史新除中領軍蔡道恭爲司州刺史車駕東歸至姑熟丙辰禪位梁王丁巳廬陵王

寶源薨夏四月辛酉禪詔至皇太后遜外宮丁
卯梁王奉帝爲巴陵王宮于姑孰行齊正朔矣
如故事戊辰薨年十五追尊爲齊和帝葬恭安
陵車置款醜雲罕樂輦八佾始於齊晉禮王于
史臣曰夏以桀亡殷隨紂滅郊天改朔理無延
世而皇符所集重興西楚神器暨來雖有冥數
徽名大號斯爲幸矣魏志刻王寶外晉熙王寶
贊曰和帝晚隆掃難清宮達機覩運高頌永終
本紀第八

